

II SAT-BÓ·-JÍⁿ (10)

1 Sò-lô sí-liáu, iā Tāi-pit̄ thāi-sí A-má-lèk lāng tò-lāi ê sí, Tāi-pit̄ toà tī Sé-kek-lāh nng-jit̄. ²Kàu tē-saⁿ jīt̄, khoàⁿ ah, ū chit̄-lāng tui iāⁿ-poāⁿ, tui Sò-lô hia, lâi, i-chiūⁿ thiah-līh, thau-khak sám thō·-hún, kàu Tāi-pit̄ hia, chiū phak tī toē--nih pài i. ³Tāi-pit̄ mnḡ i kóng, Lí tui toh-lōh lâi? I òn kóng, Goá tui Í-sek-liát ê kun-iāⁿ cháu-lāi. ⁴Tāi-pit̄ koh mnḡ i, kóng, Tāi-chi cháiⁿ-iūⁿ? chhiáⁿ lí ká goá kóng. I òn kóng, Peh-siⁿ tui chiàn-tin̄ tô-cháu, peh-siⁿ choē-choē tó-teh sí--khì; Sò-lô kap i ê kiáⁿ Iok-ná-tan iā sí. ⁵Tāi-pit̄ ká tui i kóng ê siāu-liân lāng kóng, Lí cháiⁿ-iūⁿ chai Sò-lô kap i ê kiáⁿ Iok-ná-tan sí ah? ⁶Ká i kóng ê siāu-liân lāng kóng, Goá ngó·-jiân kàu Ki-lī-pho soaⁿ, khoàⁿ-kìⁿ Sò-lô oà tī i ê chhiuⁿ, ū chiàn-chhia bé-peng jip-oá i. ⁷I oát-thau khoàⁿ goá, chiū kiò goá; goá òn kóng, Goá tī chia. ⁸I mnḡ goá kóng, Lí sī sīm-mih lāng? Goá òn kóng, Goá sī A-má-lèk lāng. ⁹I koh ká goá kóng, Chhiáⁿ lí kün-oá goá lâi thāi-sí goá, in-ūi goá chin thòng-khó·, goá ê sīⁿ-miā iáu hó-hó. ¹⁰Goá chiū kün-oá i, lâi thāi-sí i, in-ūi goá chai i tó--lōh-khì liáu, tek-khak boē oáh; goá chiū thēh i thau-khak--nih ê bián-liū, kap i ê chhiū-khoân, toà kàu goá ê chú chia. ¹¹Tāi-pit̄ chiū thiah-līh saⁿ, kun-tè i ê lāng iā sī án-ni. ¹²Ūi-tiōh Sò-lô kap i ê kiáⁿ Iok-ná-tan kap Iā-hô-hoa ê peh-siⁿ, kap Í-sek-liát ke, pi-ai thī-khau kìm-chiāh kàu jīt̄-àm,

in-ūi in tó tī to-ē. ¹³Tāi-pit̄ ká tui i kóng ê siāu-liân lāng kóng, Lí tui toh-lōh lâi? Ìn kóng, Goá sī chhut-goā lāng ê kiáⁿ, A-má-lèk lāng. ¹⁴Tāi-pit̄ tui i kóng, Lí chhun-chhiū thāi-sí Iā-hô-hoa só· boah-iū-ê, cháiⁿ-iūⁿ bô kiaⁿ ah? ¹⁵Tāi-pit̄ kiò chit̄ ê siāu-liân lāng, kóng, Lí kün-oá khì thāi-sí i. I chiū khì phah hō· i sí. ¹⁶Tāi-pit̄ ká i kóng, Lí ê huìh kui tī lí ê thau-khak, in-ūi lí ê chhiū ka-kī kan-chèng lí kóng, Goá thāi-sí Iā-hô-hoa só· boah-iū-ê.

¹⁷Tāi-pit̄ choē ai-ko, tui-tō Sò-lô kap i ê kiáⁿ Iok-ná-tan. ¹⁸Koh kóng, Chiong chit̄ ê ai-ko kà-sī Iū-tāi lāng; chit̄ ê ai-ko miā kiò Keng-ko, siá tī Ngá-soah-jī^m ê chheh. Koa kóng,

¹⁹Í-sek-liát ah, lí ê êng-hián--ê siū thāi tī soaⁿ-thau;

Hāi ah, eng-hiông-ê sí kàu án-ni ah!

²⁰Bóh-tit̄ tī Ka-ték pò-kò,

Bóh-tit̄ tī A-sit̄-ki-lūn ê koe-lō· pò-iông,

Kiaⁿ-liáu Hui-lī-sū ê cha-bó·-gín-ná hoaⁿ-hí.

Kiaⁿ-liáu bô siū kat-lé ê lāng ê cha-bó·-gín-ná tāt̄-iát.

²¹Ki-lī-pho soaⁿ ah,

Goān bô lō·-chúi, bô hō·, tī lí hia, iā bô chhut lé-mih ê chhân;

In-ūi tī-hia íóng-sū ê tin̄-pāi siū hiat-kák,

Sò-lô ê tin̄-pāi, chhin-chhiūⁿ bô siū boah-iū-ê.

²²Tùi siū-thāi-ê ê huìh, tùi ióng-sū ê iū,
 Iok-ná-tan ê keng bô tò-thè,
 Sò-lô ê to bô khang-khang tò-túg.
²³Sò-lô kap Iok-ná-tan oáh ê sī thang thiàⁿ,
 thang hoaⁿ-hí ê;
 Sí ê sī iā bô pun-lī;
 In pí eng-chiáu khah-kín,
 Pí sai khah-kiông.
²⁴Í-sek-liát ê cha-bó-kiáⁿ ah, tiòh ūi-tiòh
 Sò-lô thi-khau,
 I bat hō· lín chhēng chu-âng-sek lâi hoaⁿ-hí;
 Hō· lín ê i-hók ū ng-kim ê chng-thāⁿ.
²⁵Ióng-sū cháiⁿ-iūⁿ tó tī chiàn-tīm!
 Iok-ná-tan siū-thāi tī lí ê soaⁿ-thâu.
²⁶Goá ê hiaⁿ Iok-ná-tan ah, goá ūi lí siong-
 sim;
 Goá chīn-chāi hoaⁿ-hí lí;
 Lí ê thiàⁿ goá chin kī-biāu,
 Iāⁿ-kè hū-jîn-lâng ê thiàⁿ.
²⁷Ióng-sū sí kàu án-ni,
 Chiàn-khì húi-biát kàu án-ni!
2 Āu-lâi Tāi-pít m̄ng Iā-hô-hoa kóng, Goá
 chiūⁿ-khì Iū-tāi chit ê siāⁿ thang mah? Iā-hô-
 hoa kā i kóng, Thang chiūⁿ khì. Tāi-pít kóng,
 Goá tiòh chiūⁿ-khì toh-lòh? I kóng, Kàu Hi-
 pek-lûn. ²Tāi-pít chiū kap i n̄ng ê bó·, chiū-sī
 Iā-su-liát lāng A-hi-loán, kap Ka-bít lāng bat
 choè Ná-pat ê bó·, miā A-pí-kai, lóng chiūⁿ-
 khì hia. ³Tāi-pít iā hō· kun-tè i ê lāng, kap
 in ták-lāng ê ke-koàn, lóng chiūⁿ-khì; in chiū
 tiàm tī Hi-pek-lûn hiah ê siāⁿ. ⁴Iū-tāi lāng
 kàu, tī-hia ēng iū boah Tāi-pít choè Iū-tāi ke
 ê ông.
 Ū lāng kā Tāi-pít kóng, Bāi-chòng Sò-lô--ê
 sī Ki-liát Ngá-pí ê lāng. ⁵Tāi-pít chiū chhe sù-
 chiá khì kīⁿ Ki-liát Ngá-pí ê lāng, kā in kóng,
 Goān Iā-hô-hoa sù-hók lín, in-ūi lín ēng chit

ê jîn-chū khoán-thāi lí ê chú Sò-lô, kā i bāi-
 chòng. ⁶Goān Iā-hô-hoa ēng jîn-chū sēng-sit
 khoán-thāi lín; goá iā beh tap lín chit ê jîn-
 chū, in-ūi lín ū kiāⁿ chit ê sū. ⁷Lín ê chhiú
 tiòh giám-ngī, lín tiòh ióng-kám, in-ūi lín ê
 chú Sò-lô í-keng sí, Iū-tāi chók iā ū ēng iū
 boah goá choè in ê ông.

⁸Sò-lô ê kun-tiúⁿ Nî-jīⁿ ê kiáⁿ Ap-nî-jīⁿ bat
 chiong Sò-lô ê kiáⁿ I-si-pho-siat toà i kè--khì
 Má-hap-liām, ⁹siat-lip i choè-ông tī-lí Ki-liát,
 A-su-lī, Iā-su-liát, Í-hoat-liân, Piān-ngá-bín,
 kap Í-sek-liát ê cheng-lāng. ¹⁰Sò-lô ê kiáⁿ I-
 si-pho-siat khí-thâu choè Í-sek-liát ông, hit-sī
 sì-cháp hē; chē-ūi n̄ng-nī. Tók-tók Iū-tāi chók
 tè Tāi-pít. ¹¹Tāi-pít tī Hi-pek-lûn choè Iū-tāi
 chók ê ông, lèk-kè chhit-nī koh lāk-gēh-jit.

¹²Nî-jīⁿ ê kiáⁿ Ap-nî-jīⁿ, kap Sò-lô ê kiáⁿ I-
 si-pho-siat ê jîn-sîn, tùi Má-hap-liām chhut-
 lâi khì Ki-piàn. ¹³Sé-ló-ngá ê kiáⁿ Iok-ap
 kap Tāi-pít ê jîn-sîn, iā chhut-lâi, tī Ki-piàn
 ê tī-piⁿ saⁿ tú-tiòh; in chiū chē--teh, chit-tūi
 chē tī tī ê chit-pēng, chit-tūi chē tī tī ê hit-
 pēng. ¹⁴Ap-nî-jīⁿ tùi Iok-ap kóng, Chhiáⁿ lí
 hō· siāu-liân lāng khí-lâi, tī lán ê bīm-cheng
 kún-chhiò. Iok-ap kóng, Thang hō· i khí-
 lâi. ¹⁵In chiū khí-lâi chiāu siāu-giáh kè-khì;
 siók Sò-lô ê kiáⁿ I-si-pho-siat ê Piān-ngá-bín
 lāng cháp-jī miā, Tāi-pít ê jîn-sîn iā ū cháp-
 jī miā. ¹⁶Ták-ê khiú i ê tui-bīm hit-lāng ê
 thâu-khak, ēng to chhak i tui-bīm hit-lāng ê
 hiáp, choè chit-ē tó--lòh-khì sí; só·-í hit só·-
 chāi kiò-choè Hi-lī-kah-hap-sò-lím, chiū-sī tī
 Ki-piàn. ¹⁷Hit-jit ê kau-chiàn chin-hiông; Ap-
 nî-jīⁿ kap Í-sek-liát lāng khah-su tī Tāi-pít ê
 peng ê bīm-cheng. ¹⁸Tī-hia ū Sé-ló-ngá saⁿ ê
 kiáⁿ, Iok-ap, A-pí-su, A-sat-hek; A-sat-hek ê
 kha gâu cháu, chhin-chhiūⁿ iá-lók chit-poaⁿ.
¹⁹A-sat-hek tui-jip Ap-nî-jīⁿ; bô phian chók

iū, tít-tít jip Ap-nî-jíⁿ. ²⁰Ap-nî-jíⁿ oát-thâu khoàⁿ kóng, A-sat-hek ah, sī lí á m̄-sī? Ìn kóng, Sī goá. ²¹Ap-nî-jíⁿ kā i kóng, Lí tiòh oát-tng chiàⁿ-pêng, á-sī tò-pêng, liáh chít ê siàu-liân lāng, ūi lí pún-sin pak i ê chiàn-saⁿ; chóng-sī A-sat-hek tít-tít tui i, m̄-khéng oát-tng. ²²Ap-nî-jíⁿ koh kā A-sat-hek kóng, Lí oát-tng bôh--tít tui-jip goá; goá siáⁿ-sū tiòh phah lí tó-toē? nā án-ni, goá ū sím-mih bīn-bák thang khi kìn lí ê hiaⁿ Iok-ap. ²³I iū-goān m̄-khéng oát-tng; Ap-nî-jíⁿ chiaⁿ ēng chhiuⁿ-pìⁿ-āu ê to chhák-jip i ê pak-tó; chhiuⁿ chiū thàng-kè i ê ka-chiaⁿ-āu, i chiū tó tī-hia sí; kìnⁿ-nā lâi kàu A-sat-hek tó-teh sí ê sóⁿ-chāi, chiū lóng thēng-kha. ²⁴Iok-ap kap A-pí-su tui-jip Ap-nî-jíⁿ; in kàu Ki-a saⁿ tui-bīn ê A-má soaⁿ, tī Ki-piàn khòng-iá ê lō, jlt chiū lōh. ²⁵Piān-ngá-bín lāng chū-chíp tē Ap-nî-jíⁿ choē chít-tīn, khiā tī soaⁿ-téng. ²⁶Ap-nî-jíⁿ kiò Iok-ap kóng, To-kiām thāi lāng éng bô soah mah? Lí kiām m̄-chai kàu-bé ū kan-khó mah? lí beh kàu sím-mih sī hōⁿ peh-siⁿ tò-khi, bô jip in ê hiaⁿ-tī ah? ²⁷Iok-ap kóng, Goá kí éng-oah ê Siōng-tē lâi chiū-choā, nā m̄-sī lí kóng, chá-khí peh-siⁿ chiū tò-khi, bô jip i ê hiaⁿ-tī. ²⁸Tui án-ni, Iok-ap pūn sàu-kak, chēng peh-siⁿ chiū khiā-teh, bô koh tui-jip Í-sek-liát lāng, iā bô koh kau-chiàn. ²⁹Ap-nî-jíⁿ kap tē i ê lāng thong-mī kiāⁿ, keng-kè A-lāh-pa, kè Iok-tàn, tui Pit-lūn kè-khi kàu Má-hap-liām. ³⁰Iok-ap bô koh jip Ap-nî-jíⁿ, chiū tò-lâi, chū-chíp chēng peh-siⁿ; Tāi-pit ê pēng kiám cháp-káu lāng, kap A-sat-hek. ³¹Chóng-sī Tāi-pit ê peng phah-sí Piān-ngá-bín lāng, kap tē Ap-nî-jíⁿ ê lāng, kiōng saⁿ-pah lāk-cháp lāng. ³²In kng A-sat-hek khi Pek-lī-hēng, bài-chòng tī in lāu-pē ê bōng. Iok-ap kap tē i ê lāng thong-mī kiāⁿ, kàu Hi-pek-lūn

ê sī, thiⁿ tú-á kng.

3 Sò-lô ê ke kap Tāi-pit ê ke kau-chiàn kú-kú; Tāi-pit ná kiōng-sēng, Sò-lô ê ke ná soe-jiók.

²Tāi-pit tī Hi-pek-lūn siⁿ kui-nā ê kiáⁿ; toa-kiáⁿ Àm-lūn, sī Iā-su-liát lāng A-hi-loán sóⁿ siⁿ ê; ³tē-jī-ê Ki-lī-ap, sī bat choē Ka-bít lāng Ná-pat ê bóⁿ A-pí-kai sóⁿ siⁿ ê; tē-saⁿ-ê, Ap-sa-liōng, sī Ki-sút ông Tāt-mái ê cha-bóⁿ-kiáⁿ Má-ka ê kiáⁿ; ⁴tē-si-ê, A-to-ni-ngá, sī Hap-kíp ê kiáⁿ; tē-gōⁿ-ê, Sī-hoat-thē-ngá, sī A-pí-tha ê kiáⁿ; ⁵tē-lāk-ê, Í-ték-liām, sī Tāi-pit ê bóⁿ Í-kek-lāh sóⁿ siⁿ ê; chiaⁿ-ê sī Tāi-pit tī Hi-pek-lūn sóⁿ siⁿ ê.

⁶Sò-lô ê ke kap Tāi-pit ê ke kau-chiàn ê sī, Ap-nî-jíⁿ tī Sò-lô ê ke ka-kī kiōng. ⁷Sò-lô ū chít ê hui, miā kiò Lī-su-pa, sī Ai-a ê cha-bóⁿ-kiáⁿ. I-si-pho-siat tui Ap-nî-jíⁿ kóng, Lí siáⁿ-sū kap goá lāu-pē ê hui tâng-pāng ah? ⁸Ap-nî-jíⁿ in-ūi I-si-pho-siat ê oē, chiū chin siū-khi, kóng, Goá kiám-sī Iū-tāi ê káu-thau mah? goá hó khoán-thāi lí ê lāu-pē Sò-lô ê ke, kap i ê hiaⁿ-tī pēng-iú, bô chiong lí kau tī Tāi-pit ê chhiú, lí kin-á-jlt keng-jian in-ūi chít ê hū-jin-lāng chek-pī goá mah? ⁹Goá nā bô chiàu Iā-hō-hoa sóⁿ tui Tāi-pit chiū-choā-ê lâi kiāⁿ tī i, chiū goān Siōng-tē ka-pē chek-hoát. ¹⁰Ap-nî-jíⁿ, beh tui Sò-lô ê ke í-soá kok-ūi, lâi kiàn-lip Tāi-pit ê ūi, hōⁿ i tī-lí Í-sek-liát kap Iū-tāi, tui Tàn kàu Piát-sī-pa. ¹¹I-si-pho-siat, in-ūi kiaⁿ Ap-nî-jíⁿ, boē in chít-kù-oē.

¹²Ap-nî-jíⁿ ūi-tiòh pún-sin chhe sù-chiá khi kìnⁿ Tāi-pit kóng, Chit ê toē-hng siók chī-chūi ah? Koh kóng, Lí kap goá lip-iok, goá ê chhiú beh pang-chān lí, hōⁿ Í-sek-liát lóng kui lí. ¹³Tāi-pit kóng, Hó, goá kap lí lip-iok; chóng-sī goá beh tui lí thó chit-hāng, chiū-sī lí lâi kìnⁿ goá ê bīn hit-sī, nā bô chiong Sò-lô ê cha-bóⁿ-

kiáⁿ Bí-kah chhoā-lâi, tek-khak boē kîⁿ goá ê bîn. ¹⁴Tāi-pit chiū chhe sù-chiá khî kîⁿ Sò-lô ê kiáⁿ I-si-pho-siat, kóng, Lí tiòh chiong goá ê bó· Bí-kah hêng goá, i chiū-sī goá bat ēng Hui-lī-sū lāng chit-pah iōng-bút ê phê só· phèng-tiāⁿ ê. ¹⁵I-si-pho-siat chiū chhe lāng tui i ê tiōng-hu Lāh-ek ê kiáⁿ Phāⁿ-thiat hia, toà i lâi. ¹⁶I ê tiōng-hu tè i ê āu-bîn, ná-kiāⁿ ná-háu, kap i kàu Pa-hō·līm. Ap-nî-jīⁿ ká i kóng, Tò--khî ah. I chiū tò--khî.

¹⁷Ap-nî-jīⁿ kap Í-sek-liát ê tióng-ló chham-siōng, kóng, Lín chêng him-bō· Tāi-pit choē ông tī-lí lín; taⁿ tiòh kiāⁿ i; ¹⁸in-ūi Iā-hô-hoa bat lūn-kàu Tāi-pit kóng, Goá beh ēng Goá ê lô·pók Tāi-pit ê chhiú kiù Goá ê peh-siⁿ Í-sek-liát thoat-lī Hui-lī-sū lāng ê chhiú, kap chêng tui-tek ê chhiú. ¹⁹Ap-nî-jīⁿ iā kóng, hō· Piān-ngá-bín lāng thiaⁿ; koh kàu Hi-pek-lūn, chiong Í-sek-liát lāng, kap Piān-ngá-bín choān-ke, it-chhè só· khoàⁿ-choē hó ê, kóng hō· Tāi-pit thiaⁿ. ²⁰Ap-nî-jīⁿ kap jī-cháp lāng kàu Hi-pek-lūn kîⁿ Tāi-pit. Tāi-pit ūi-tiòh Ap-nî-jīⁿ, í-kíp kap i lâi ê lāng, siat iān-siáⁿ. ²¹Ap-nî-jīⁿ ká Tāi-pit kóng, Goá beh khî--lâi, khî chio-chíp Í-sek-liát chêng-lāng lâi kîⁿ goá ê chú goá ê ông, hō· in thang kap lí līp-iok, lí chiū thang choē-ông, chiàu sim só· ài lâi koán-lí. Tāi-pit chiū sàng Ap-nî-jīⁿ khî; i chiū pêng-an khî. ²²Tāi-pit ê peng kap Iok-ap chhut-kun tò--lâi, toà choē-choē chhiúⁿ ê mih lâi; hit-sī Ap-nî-jīⁿ bô tī Hi-pek-lūn Tāi-pit hia, in-ūi Tāi-pit í-keng sàng i khî, i iā pêng-an khî. ²³Iok-ap kap tè i ê choān-kun í-keng kàu, ū lāng thong-ti Iok-ap kóng, Nî-jīⁿ ê kiáⁿ Ap-nî-jīⁿ lâi kîⁿ ông, ông sàng i khî, i iā pêng-an khî. ²⁴Iok-ap khî kîⁿ ông kóng, Lí choē sim-mih ah? Khoàⁿ ah, Ap-nî-jīⁿ lâi kîⁿ lí, lí siáⁿ-sū sàng i khî? taⁿ i khî-liáu lah; ²⁵lí

chai Nî-jīⁿ ê kiáⁿ Ap-nî-jīⁿ lâi, sī beh phiàn lí, ài chai lí ê chhut kap lí ê jip, kap lí it-chhè só· choē ê sū. ²⁶Iok-ap tui Tāi-pit hia chhut-lâi, chiū chhe sù-chiá khî jip Ap-nî-jīⁿ; in chiū tui Se-lāh ê chíⁿ toà i lâi; chóng-sī Tāi-pit m̄-chai. ²⁷Ap-nî-jīⁿ tò-túg-lâi kàu Hi-pek-lūn, Iok-ap chhoā i kàu siāⁿ-m̄ng-kháu, ké beh àm-chīⁿ kap i kóng-oē, chiū tī-hia chhák-thàu i ê pak-tó·, i chiū sí; che sī ūi-tiòh i ê sió-tī A-sat-hek hō· i thài-sí. ²⁸Āu-lâi Tāi-pit thiaⁿ-kîⁿ, chiū kóng, Lâu Nî-jīⁿ ê kiáⁿ Ap-nî-jīⁿ ê huìh, chit ê choē tī Iā-hô-hoa ê bîn-chêng tek-khak éng-oán bô kui tī goá, kap goá ê kok. ²⁹Goān hit-ê kui tī Iok-ap ê thau-khak, kap i ê lâu-pē choān-ke; koh goān Iok-ap ê ke hoān-tiòh hā-siau-ê, thái-ko-ê, á-sī oà koáiⁿ-á ê, hō· to thài-sí-ê, bô thang chiáⁿ ê, éng bô tng. ³⁰Iok-ap kap i ê sió-tī A-pí-su thài-sí Ap-nî-jīⁿ, sī in-ūi i tī Ki-piàn kau-chiàn ê sí, thài-sí in ê sió-tī A-sat-hek.

³¹Tāi-pit ká Iok-ap kap tè i ê chêng peh-siⁿ kóng, Lín tiòh thiah-līh saⁿ, hā moā-pò·, tī Ap-nî-jīⁿ bîn-chêng thī-khàu. Tāi-pit ông iā tè tī i ê koaⁿ-chhā-āu. ³²In bài-chòng Ap-nî-jīⁿ tī Hi-pek-lūn; ông oá Ap-nî-jīⁿ ê bōng lâi thī-khàu, chêng peh-siⁿ iā thī-khàu. ³³Ông ūi-tiòh Ap-nî-jīⁿ pi-ai kóng,

Ap-nî-jīⁿ cháiⁿ-iūⁿ chhin-chhiūⁿ gōng-lāng ê sí ah?

³⁴Lí ê chhiú bô khún-pák, lí ê kha bô só· liān;

Lí sí chhin-chhiūⁿ lāng sí tī pháiⁿ-lāng ê bîn-chêng.

³⁵Tui án-ni chêng peh-siⁿ koh ūi-tiòh i ai-khàu. Jit bē lóh ê sí, chêng peh-siⁿ lâi khng Tāi-pit chiáⁿ piáⁿ; chóng-sī Tāi-pit chiū-choā kóng, Goá nā tī jit bē lóh ê tãi-seng chiáⁿ tām-póh piáⁿ, á-sī chiáⁿ pát hāng mih, goān

Siông-tè ka-pē chek-hoat goá. ³⁶Chèng peh-sìⁿ chù-ì khoàⁿ, lóng khoàⁿ-choè hó, chhin-chhiūⁿ ông hoan só· choè ê, chèng peh-sìⁿ lóng khoàⁿ-choè hó. ³⁷Hit-jit chèng peh-sìⁿ kap Í-sek-liat chèng-lâng chiaⁿ chai thâi-sí Nî-jî^m ê kiáⁿ Ap-nî-jî^m, lóng m̄-sī chhut tī ông ê ì-sù. ³⁸Ông kâ i ê jîn-sîn kóng, Lín kiám m̄-chai kin-á-jit tī Í-sek-liat tiong, sí chit ê hô-kiat ê tãi úi-jîn mah? ³⁹Goá sui-jian siū boah-iū choè ông, kin-á-jit iáu sī loán-jiók; Sé-ló·ngá ê kiáⁿ, chiaⁿ ê lêng pí goá khah-kiông; kiâⁿ-pháiⁿ ê lêng, goan Iâ-hô-hoa chiàu i ê pháiⁿ pò-èng i.

4 Sò-lô ê kiáⁿ thiaⁿ-kìⁿ Ap-nî-jî^m sí tī Hi-pek-lûn, chhiú chiū nng--lôh-khì. Í-sek-liat chèng-lâng iā lóng gāng-gāng. ²Sò-lô ê kiáⁿ ū nng ê tui-tiúⁿ, chit-ê miā Pa-ná, chit-ê miā Lī-kah, sī Piān-ngá-bín chi-phài, Pí-liók lêng Lîm-bûn ê kiáⁿ; in-ūi Pí-liók iā sion tī Piān-ngá-bín. ³Pí-liók lêng chá-chêng cháu kàu Ki-tha-im, chhut-goā tī-hia, kàu kin-á-jit.

Sò-lô ê kiáⁿ Iok-ná-tan ū chit ê kiáⁿ nng-kha lóng pái, miâ-kiò Bí-hui-pho-siat; tng Sò-lô kap Iok-ná-tan ê siau-sit tui Iâ-su-liat thoan-lâi ê sī, i tú-á gō·hè; i ê ni-bú phō i cháu; in-ūi cháu chin-kín, gín-ná poah--lôh-lâi, chiū tī pái-kha.

⁵Pí-piók lêng, Lîm-bûn ê kiáⁿ Lī-kah kap Pa-ná, chhut-khì, iok-liók jit sio-lô ê sī, kàu I-si-pho-siat ê chhù. I tī tiong-tàu tú-á teh khùn. ⁶In jip chhù-lâi ké-iaⁿ beh put béh, chiū chhì-thau I-si-pho-siat ê pak-tó; Lī-kah kap i ê hiaⁿ-tī Pa-ná chiū tô-cháu. ⁷In jip pâng-lâi ê sī, I-si-pho-siat tú-á tī pâng-lâi tó tī chhng--nih teh khùn; in chiū phah i, thâi-sí i, koah i ê thau-khak, toà i khì, tui A-lâh-pa ê lô· thau-mi kiâⁿ. ⁸In toà I-si-pho-siat ê thau-khak kàu Hi-pek-lûn Tāi-pit hia, kâ

ông kóng, Lí ê tui-ték Sò-lô bat siâu-siūⁿ lí ê sîⁿ-miā ê, khoàⁿ ah, che sī i ê kiáⁿ I-si-pho-siat ê thau-khak. Iâ-hô-hoa kin-á-jit ūi-tiòh goá ê chú goá ê ông pò-siū tī Sò-lô kap i ê hō·-è. ⁹Tāi-pit in Pí-liók lêng Lîm-bûn ê kiáⁿ Lī-kah kap i ê hiaⁿ-tī Pa-ná, kâ i kóng, Iâ-hô-hoa kiù-siók goá ê sîⁿ-miā thoat-lī lóng-chóng ê khó·-lân; goá kí I ê éng-oah lâi chiū-choā; ¹⁰chêng ū lêng pò goá kóng, Sò-lô í-keng sí, i kâ-kī liáh-choè sī pò hó siau-sit, goá chiū liáh i tī Sé-keh-lâh kâ i thâi-sí, che sī goá hō· i choè thoan siau-sit ê pò-siūⁿ; ¹¹hō-hong pháiⁿ-lêng jip gī-lêng ê chhù, thâi i tī bîn-chhng--nih, goá kiám bô beh tui lín ê chhiú thó i ê huìh, tui biat lín tī toē-chiūⁿ mah? ¹²Tāi-pit bēng-lēng i ê siâu-liân lêng, in chiū thâi-sí in, chām-tng in ê kha-chhiú, tiau tī Hi-pek-lûn ê tī-piⁿ; iā chiong I-si-pho-siat ê thau-khak bāi-chong tī Hi-pek-lûn Ap-nî-jî^m ê bōng.

5 Tng-sī Í-sek-liat chèng chi-phài kàu Hi-pek-lûn, kìⁿ Tāi-pit kóng, Khoàⁿ ah, goán sī lí ê kut-jiók. ²Chêng Sò-lô choè goán ê ông ê sī, chhoā Í-sek-liat chhut-jip-ê sī lí; Iâ-hô-hoa iā bat kâ lí kóng, Lí beh chiàu-kò· Goá ê peh-siⁿ Í-sek-liat, iā beh choè Í-sek-liat ê kun-ông. ³Tui án-ni Í-sek-liat ê tióng-ló lóng lâi Hi-pek-lûn kìⁿ ông. Tāi-pit ông tī Hi-pek-lûn Iâ-hô-hoa ê bîn-chêng kap in lîp-iok. In chiū ēng iū boah Tāi-pit choè Í-sek-liat ê ông. ⁴Tāi-pit chē-ūi ê sī saⁿ-cháp hē, i chē-ūi sī-cháp nī. ⁵Tī Hi-pek-lûn choè Iū-tāi ông chhit-nī koh lák-gêh-jit; tī Iâ-lô·sat-léng choè thong Í-sek-liat kap Iū-tāi ê ông saⁿ-cháp-saⁿ nī.

⁶Ông kap tè i ê lêng lâi kàu Iâ-lô·sat-léng beh kong-kek khiā-khí hit só·chāi ê Iâ-pò·su lêng. In tui Tāi-pit kóng, Lí nā bô tui chiaⁿ ê chhiⁿ-mî-ê. pái-kha-ê, chiū boē jip chit só·chāi; in phah-sng Tāi-pit koat-toàn

boē jíp chia. ⁷Chóng-sī Tāi-pít kong-kek Sek-an ê oē-só·, che chiū-sī Tāi-pít ê siáⁿ. ⁸Tng hit-jít Tāi-pít kóng, Chī-chūi phah Iâ-pò·-su lāng, tióh tui chúu-kau chiūⁿ khi phah Tāi-pít ê sim só· oàn-hūn pái-kha-ê, chhiⁿ-mî-ê. Tui án-ni ū siók-gú kóng, Ū chhiⁿ-mî pái-kha-ê; lāng boē-oē jíp chhū. ⁹Tāi-pít tiàm tī oē-só· chheng hit só·-chāi choē Tāi-pít ê siáⁿ. Tāi-pít tui Bí-lô sî-ūi khí-chō, iā ñg lāi-bīn. ¹⁰Tāi-pít ná-kú ná kiông-sēng, in-ūi Iâ-hô-hoa bān-kun ê Siōng-tè kap i tī-teh.

¹¹Chhui-lô ông Hi-lân chhe sù-chiá toà pek-hiūⁿ-chhâ kap bák-chhiūⁿ chiòh-chhiūⁿ kàu Tāi-pít hia. In ká Tāi-pít khí chhū. ¹²Tāi-pít chai Iâ-hô-hoa tiāⁿ-tióh siat-líp i choē Í-sek-liát ông; koh ūi-tiòh I ê peh-siⁿ Í-sek-liát lāi heng-khí i ê kok.

¹³Tāi-pít tui Hi-pek-lūn lāi liáu-āu, tui Iâ-lō·-sat-léng koh lóp hō·-hui. Tāi-pít koh siⁿ kiáⁿ, cha-bó·-kiáⁿ. ¹⁴Tī Iâ-lō·-sat-léng só· siⁿ ê kiáⁿ chiū-sī Sa-bó·-a, Sok-pā, Ná-tan, Só·-lô-būn; ¹⁵Ek-hat, Í-lī-su-a, Nī-húi, Ngá-hui-a; ¹⁶Í-lī-sa-má, Í-lī-ngá-tāi, Í-lī-hoat-liát.

¹⁷Hui-lī-sū lāng thiaⁿ-kìⁿ lāng ēng iū boah Tāi-pít choē Í-sek-liát ông; Hui-lī-sū ê cheng-lāng chiū chiūⁿ-lāi siàu-siūⁿ Tāi-pít. Tāi-pít thiaⁿ-kìⁿ chiū lóh-khì kàu iāⁿ-chē. ¹⁸Hui-lī-sū lāng í-keng lāi, pò·-tì tī Lī-hoat-im ê soaⁿ-kok. ¹⁹Tāi-pít m̄ng Iâ-hô-hoa kóng, Goá thang chiūⁿ--khì kong Hui-lī-sū lāng mah? Lí beh chiong in kau tī goá ê chhiú mah? Iâ-hô-hoa ká Tāi-pít kóng, Lí thang chiūⁿ--khì, in-ūi Goá tek-khak beh chiong Hui-lī-sū lāng kau tī lí ê chhiú. ²⁰Tāi-pít lāi kàu Pa-lék-pí-láh-sim; Tāi-pít tī-hia phah in, kóng, Iâ-hô-hoa tī goá ê bīn-chēng chhiong-soàⁿ goá ê tui-ték, chhin-chhiūⁿ chúi ê chhiong-soàⁿ chit-iūⁿ; só·-í miá hit só·-chāi choē Pa-lék-pí-láh-sim. ²¹In

khì-sak in ê ngó·-siōng tī-hia; Tāi-pít kap tē i ê lāng khiòh i khì.

²²Hui-lī-sū lāng koh chiūⁿ--lāi, pò·-tì tī Lī-hoat-im ê soaⁿ-kok. ²³Tāi-pít m̄ng Iâ-hô-hoa; Iâ-hô-hoa kóng, M̄-thang tit-tit chiūⁿ-khì, tióh oan kau in ê āu-bīn, tui sng-chāi-chhiū tui-bīn phah in; ²⁴Í thiaⁿ-kìⁿ tī sng-chāi-chhiū bé, ū kha-pō· siaⁿ, chiū tióh koáⁿ-kín chìn-hēng, in-ūi hit-sī Iâ-hô-hoa í-keng tui lín ê thau-chēng chhut-khì, kong-kek Hui-lī-sū lāng ê kun-tūi. ²⁵Tāi-pít chiū chiàu Iâ-hô-hoa só· hoan-hù-ê khi kiāⁿ, kong-kek Hui-lī-sū lāng, tui Ka-pa kàu Ki-sek.

6 Tāi-pít koh chū-chíp Í-sek-liát tióng só· kéng ê saⁿ-bān lāng. ²Tāi-pít khí-sin chhoā tē i ê cheng peh-siⁿ, tui Pa-láh Iū-tāi khì, beh tui hia kng Siōng-tè ê kúi lāi; chit ê kúi ê miá sī ēng chē tī n̄ng ê ki-lō·-peng ê tióng-kan bān-kun ê Iâ-hô-hoa ê miá lāi chheng--ê. ³In hē Siōng-tè ê kúi tī sin ê chhia, tui soaⁿ-téng A-pí-ná-tát ê ke chàì--chhut-lāi; A-pí-ná-tát n̄ng ê kiáⁿ, O·sat kap A-hi-iok, koáⁿ hit ê sin-chhia. ⁴In chiong i kap Siōng-tè ê iok-kúi, tui soaⁿ-téng A-pí-ná-tát ê ke chàì--chhut-lāi. A-hi-iok kiāⁿ tī kúi ê thau-chēng. ⁵Tāi-pít kap Í-sek-liát ê choān-ke, tī Iâ-hô-hoa ê bīn-chēng ēng siōng-chhâ só· cho ták-hō ê gák-khì, kap khim, sek, lin-long-kó· toā-kó·, poát, lāi chok-gák thiàu-bú. ⁶In kàu Ná-kùn ê gō·kak-tiūⁿ, O·sat chhun-chhiú hū Siōng-tè ê iok-kúi, in-ūi gū tióh-tak. ⁷Iâ-hô-hoa siū-khì O·sat; Siōng-tè tī-hia in-ūi i ê chhò-gō· lāi phah i, i chiū sí tī-hia, tī Siōng-tè ê kúi-piⁿ. ⁸In-ūi Iâ-hô-hoa hut-jiān phah-sí O·sat, Tāi-pít bô hoaⁿ-hí; chiū chheng hit só·-chāi choē Pí-liát-su-o·sat, kàu kin-á-jít. ⁹Tng hit-jít Tāi-pít kiaⁿ Iâ-hô-hoa, kóng, Iâ-hô-hoa ê kúi thái-thó thang kàu goá ê só·-chāi. ¹⁰Tui án-ni

Tāi-pit m̄-khéng chiong Iâ-hô-hoa ê kūi kng jip Tāi-pit ê siāⁿ, kàu ka-kī ê só·-chāi; Tāi-pit chiū kng i oat-jip Ka-ték lâng Gô-piat-í-tong ê ke. ¹¹Iâ-hô-hoa ê kūi tiàm tī Ka-ték lâng Gô-piat-í-tong ê chhù saⁿ gèh-jit, Iâ-hô-hoa sù hok-khì hō· Gô-piat-í-tong kap i ê choân-ke.

¹²Ū lâng kā Tāi-pit ông kóng, Iâ-hô-hoa in-ūi Siōng-tè ê kūi, sù-hok tī Gô-piat-í-tong ê ke, kap kìⁿ-nā siók tī i ê. Tāi-pit chiū khì, hoaⁿ-hí kng Siōng-tè ê kūi tui Gô-piat-í-tong ê chhù, kàu Tāi-pit ê siāⁿ. ¹³Kng Iâ-hô-hoa iok-kūi ê lâng kiāⁿ lák-pō·, Tāi-pit chiū hiàn chit chiah gū, kap chit chiah pui ê cheng-siⁿ, choè chè-sū. ¹⁴Tāi-pit tī Iâ-hô-hoa ê bīn-chêng chīn-lát thiàu-bú. Tāi-pit hā iù-toē-pò· ê í-hut-tek. ¹⁵Án-ni Tāi-pit kap Í-sek-liát choân-ke kng Iâ-hô-hoa ê kūi chiūⁿ--lâi, chhut hoaⁿ-hí ê siaⁿ, pūn sàu-kak. ¹⁶Iâ-hô-hoa ê kūi jip Tāi-pit siāⁿ ê sī, Sò-lô ê cha-bó·-kiáⁿ Bí-kah tui thang-á-mng khoàⁿ, khoàⁿ-kìⁿ Tāi-pit chōng--khí-lâi thiàu-bú tī Iâ-hô-hoa ê bīn-chêng, sim chiū khoàⁿ-khin i. ¹⁷In kng Iâ-hô-hoa ê kūi jip--khì, hē tī i ê só·-chāi, chiū-sī Tāi-pit só· ūi i tah ê pò·-pīⁿ; Tāi-pit tī Iâ-hô-hoa ê bīn-chêng hiàn sio-chè kap siā-un-chè. ¹⁸Tāi-pit hiàn sio-chè kap siā-un-chè bēng-pék, chiū ēng bān-kun Iâ-hô-hoa ê miā kā peh-siⁿ chiok-hok. ¹⁹Koh tī hiah ê chēng peh-siⁿ, chiū-sī Í-sek-liát chēng-lâng, bô-lūn lâm-lú, múi-lâng pun hō· in chit ê piáⁿ, chit tè bah, chit ê phū-tô-koaⁿ piáⁿ; chēng peh-siⁿ chiū khì, ták-lâng tò-khì in ê chhù.

²⁰Tāi-pit tò-khì beh kā i ê ke-koàn chiok-hok, Sò-lô ê cha-bó·-kiáⁿ Bí-kah chhut-lâi ngiā-chih Tāi-pit, kóng, Í-sek-liát ông kin-á-jit ū joā-toā ēng-kng ah! kin-á-jit lô·-thé tī jīn-sin ê lú-pī bák-chiu chēng, chhin-chhiūⁿ

chit ê bô hē-lôh lâng bô ùi kiàn-siàu lô·-thé chit-iūⁿ. ²¹Tāi-pit kā Bí-kah kóng, Che sī tī Iâ-hô-hoa ê bīn-chêng, I kóng goá poāⁿ-kè lí ê lâu-pē kap i ê choân-ke, siat-lip goá choè Iâ-hô-hoa ê peh-siⁿ Í-sek-liát ê kun-ông, só· í goá beh tī Iâ-hô-hoa ê bīn-chêng thiàu-bú; ²²goá beh pí chit-ê koh khah chho·-siók, ka-kī khoàⁿ-choè pi-chiān; lí só· kóng hiah ê lú-pī, goá beh siū in chun-tiōng. ²³Tui án-ni Sò-lô ê cha-bó·-kiáⁿ Bí-kah kàu sí ê jit bô siⁿ kiáⁿ-jī.

7 Tng ông tiàm tī chhù-lâi, Iâ-hô-hoa iā í-keng hō· i thoat-lī sī-ūi ê tui-ték, tit-tiōh an-chēng ê sī, ông kā sian-ti Ná-tan kóng, Khoàⁿ ah, goá tiàm tī pek-hiuⁿ-chhâ ê chhù-lâi, chōng-sī Siōng-tè ê kūi tiàm tī tiūⁿ-lī-lâi. ³Ná-tan tui ông kóng, Kìⁿ-nā lí ê sim só·-siūⁿ-ê, thang khì choè; in-ūi Iâ-hô-hoa kap lí tī-teh. ⁴Hit-mī Iâ-hô-hoa ê oē līm-kàu Ná-tan kóng, ⁵Lí khì kā Goá ê lô·-pók Tāi-pit kóng, Iâ-hô-hoa án-ni kóng, Lí beh khí chhù hō· Goá khiā-khí mah? ⁶Tui Goá chhoā Í-sek-liát lâng chhut Ai-kip ê jit kàu kin-á-jit, Goá bē-bat tiàm tī chhù--nih, siōng-siōng kiāⁿ tī pò·-pīⁿ kap hoē-bō·. ⁷Kìⁿ goá kap Í-sek-liát lâng só· kiāⁿ-kàu ê só·-chāi, kiám bat tui Í-sek-liát chit chi-phài ê sū-su, chiū-sī Goá bēng-lēng chiàu-kò· Goá ê peh-siⁿ Í-sek-liát ê, kóng, Lín siáⁿ-sū bô kā Goá khí pek-hiuⁿ-chhâ ê chhù ah? ⁸Taⁿ lí tiōh kā Goá ê lô·-pók Tāi-pit kóng, Bān-kun ê Iâ-hô-hoa án-ni kóng, Goá tui iūⁿ-tiāu-tiong, lí teh thàn iūⁿ-kún, kóng lí, choè Goá ê peh-siⁿ Í-sek-liát ê kun-ông. ⁹Lí bô-lūn khì toh-lôh, Goá siōng-siōng kap lí tī-teh, tī lí ê bīn-chêng chián-tū lí it-chhè ê tui-ték. Goá tek-khak hō· lí tit-tiōh toā-miā, chhin-chhiūⁿ sè-chiūⁿ hiah ê úi-jīn ê toā-miā chit-iūⁿ. ¹⁰Goá beh ūi-tiōh Goá ê peh-siⁿ Í-sek-liát tiāⁿ-tiōh chit ê só·-chāi,

chai-poê in, hō· in tiàm tī ka-kī ê só·-chāi, bô koh chhian-soá, hong-ok ê lūi bô chhin-chhiūⁿ chá·-chêng kiáu-jiáu in, ¹¹iā bô chhin-chhiūⁿ tùi Goá bēng-lēng sū-su koán-lí Goá ê peh-siⁿ Í-sek-liát ê jít; Goá beh hō· lí thoat-lī it-chhè ê tùi-tèk, tit-tiòh an-chēng. Koh Iâ-hô-hoa kā lí kóng, Iâ-hô-hoa beh kā lí kiàn-líp ke. ¹²Kàu lí ê jít-chí í-keng moá, lí kap lí ê liát-chó· saⁿ-kap khùn ê sí, Goá beh siat-líp lí só· chhut ê hō·-è lâi soà-chiap lí, Goá iā beh kian-kò· i ê kok; ¹³i beh ūi Goá ê miâ khí tiān; Goá beh kian-kò· i ê kok-ūi, tit-kàu éng-oán. ¹⁴Goá beh choè i ê pē, i beh choè Goá ê kiáⁿ; i nā hoān-choē, Goá beh ēng lāng ê koáiⁿ, sè-kan lāng ê piⁿ, chek-tok i. ¹⁵Chóng-sī Goá ê chū-ài bô beh lī-khui i, chhin-chhiūⁿ Goá hō· i lī-khui Sò-lô, chiū-sī Goá só· khì-sak tī lí ê bīn-chēng ê. ¹⁶Lí ê ke kap lí ê kok, beh éng-oán kiàn-líp tī lí ê bīn-chēng; lí ê kok-ūi iā beh kian-kò· kàu éng-oán. ¹⁷Ná-tan chiu chiàu che it-chhè ê oē, chiàu che it-chhè ê khé-sī, án-ni kā Tāi-pit kóng.

¹⁸Tāi-pit ông chiū jip--khì, chē tī Iâ-hô-hoa ê bīn-chēng, kóng, Chú Iâ-hô-hoa ah, goá sī chī-chūi, goá ê ke sng-choè sím-mih, Lí keng-jiân chhoā goá kàu chit ê toē-ūi ah? ¹⁹Chú Iâ-hô-hoa ah, che Lí iáu khoàⁿ-choè sió-khoá, Lí koh lūn-kàu Lí ê lô·-pók ê ke kàu tī kú-tng; Chú Iâ-hô-hoa ah, che sī jîn-kan ê lē. ²⁰Tāi-pit iáu ū sím-mih oē thang tùi Lí kóng ah? Chú Iâ-hô-hoa ah, Lí chai Lí ê lô·-pók. ²¹Ūi-tiòh Lí ê oē, koh chiàu Lí ê sim, Lí kiāⁿ che it-chhè ê toā-sū, hō· Lí ê lô·-pók chai; ²²Iâ-hô-hoa Siōng-tè ah, Lí sī chī-toā; chiàu goán ê hī-khang só· thiaⁿ-kìⁿ ê, bô chit-ê oē pí-tit Lí, Lí í-goā bô ū Siōng-tè. ²³Toē-chiūⁿ ū sím-mih kok chhin-chhiūⁿ Lí ê peh-siⁿ Í-sek-liát ah? chiū-sī Siōng-tè khì kiù-siók i, kui tī ka-

kī choè peh-siⁿ, hō· I ū miâ-siaⁿ, koh tī Lí ê peh-siⁿ ê bīn-chēng, chiū-sī Lí tùi Ai-kip, kap liát-pang, í-kip in hiah ê siōng-tè só· kiù-siók chhut-lâi ê, ūi-tiòh lín kiāⁿ toā ê tãi-chì, ūi-tiòh Lí ê toē choè thang kiaⁿ ê sū ah? ²⁴Lí bat ūi ka-kī kiàn-líp Lí ê peh-siⁿ Í-sek-liát éng-oán choè Lí ê peh-siⁿ; Iâ-hô-hoa ah, Lí iā choè in ê Siōng-tè. ²⁵Iâ-hô-hoa Siōng-tè ah, taⁿ Lí só· lūn-kàu Lí ê lô·-pók, kap Lí ê lô·-pók ê ke, goān Lí éng-oán kian-kò· i, chiàu Lí só·-kóng-ê lâi kiāⁿ. ²⁶Goān lāng éng-éng chun Lí ê miâ choè-toā, kóng, Bān-kun ê Iâ-hô-hoa sī koán-lí Í-sek-liát ê Siōng-tè; koh Lí ê lô·-pók Tāi-pit ê ke beh tī Lí ê bīn-chēng kian-kò·. ²⁷Bān-kun ê Iâ-hô-hoa, Í-sek-liát ê Siōng-tè ah, in-ūi Lí khé-sī Lí ê lô·-pók, kóng, Goá beh kā lí kiàn-líp ke, só·-í Lí ê lô·-pók hó-táⁿ ēng chit ê kī-tó lâi tùi Lí kī-tó. ²⁸Taⁿ Chú Iâ-hô-hoa ah, Lí sī Siōng-tè ah, Lí ê oē sī chin-sit, Lí iā ēng chit ê hok-khì èng-ún Lí ê lô·-pók; ²⁹taⁿ kiù Lí sù-hok Lí ê lô·-pók ê ke, hō· i éng-oán tī Lí ê bīn-chēng; Chú Iâ-hô-hoa ah, in-ūi Lí ū kóng i, goān Lí ê lô·-pók ê ke tùi Lí ê sù-hók lâi tit-tiòh hok-khì, kàu éng-oán.

8 Chit-tiáp liáu-āu Tāi-pit phah Hui-lī-sū lāng, hō· in hāng-hók; Tāi-pit koh tùi Hui-lī-sū lāng ê chhiú chhiú Bí-tek-an-má. ²Koh phah Mô·-ap, hō· in tó tī toē-nih, ēng soh niū i, niū nng tiâu soh-ê hō· i sí, niū moá chit tiâu soh-ê hō· i oáh; Mô·-ap lāng chiū kui-hók Tāi-pit, lâi chìn-kòng.

³Tāi-pit phah Só-pa ông Lī-háp ê kiáⁿ Hap-tāi-tí-siā, tī i khì Toā-hô, beh khoe-hók i ê koán ê sí. ⁴Tāi-pit liáh i ê bé-peng chit-chheng chhit pah, pō·-peng nng-bān; Tāi-pit chiong i chiàn-chhia ê bé koah-tng i ê kha-kun; chí-ū lâu chit-pah tiuⁿ chia ê bé. ⁵Tāi-má-sek ê A-lân lāng lâi pang-chān Só-pa ông

Hap-tāi-tí-siā, Tāi-pit chiū thāi-sí A-lân lāng n̄ng-bān n̄ng-chheng. ⁶Tùi án-ni Tāi-pit tī Tāi-má-sek ê A-lân siat-líp kun-iāⁿ. A-lân lāng chiū kui-hók Tāi-pit, lâi chìn-kòng. Tāi-pit bô-lūn khi toh-lóh, Iâ-hô-hoa lóng hō· i khah-iāⁿ. ⁷Tāi-pit chhú Hap-tāi-tí-siā hiah ê jîn-sin só· koāⁿ kim ê pîn-pai, toà kàu Iâ-lō-sat-léng. ⁸Tāi-pit ông koh tùi siók Hap-tāi-tí-siā ê Pí-tha kap Pí-lô-tha ê siāⁿ, tit-tiòh choē-choē tâng.

⁹Hap-ná ông Tô-í thiaⁿ-kìⁿ Tāi-pit phah-iāⁿ Hap-tāi-tí-siā ê choân-kun; Tô-í chiū chhe i ê kiáⁿ Iok-lân khi kìⁿ Tāi-pit ông, chhéng-an i, kā i chiok-hok, in-ūi i phah-iāⁿ Hap-tāi-tí-siā; in-ūi Hap-tāi-tí-siā kap Tô-í siông-siông kau-chiàn. Iok-lân ê chhiú iā toà gūn-khi, kim-khi, tâng-khi. ¹¹Tāi-pit ông chiū ēng chiah ê mih choē-sèng, hiàn hō· Iâ-hô-hoa, chhin-chhiūⁿ chēng ēng i só· khah-iāⁿ liát-kok ê kim-gūn choē-sèng lâi hiàn chit-iūⁿ; ¹²chiū-sī tùi A-lân, Mô-ap, A-būn lāng, Hui-lī-sū lāng, A-má-lék, só· tit-tiòh ê, í-kíp tùi Sô-pa ông Lī-háp ê kiáⁿ Hap-tāi-tí-siā só· chhiúⁿ ê.

¹³Tāi-pit tī Iâm ê soaⁿ-kok phah-sí A-lân chit-bān poeh-chheng lāng; tò--lâi ê sī, chiū tit-tiòh toā miâ-siāⁿ. ¹⁴Koh i tī Í-tong siat kun-iāⁿ; chiū-sī tī Í-tong choân-toē siat kun-iāⁿ. Í-tong lāng chiū lóng kui-hók Tāi-pit. Tāi-pit bô-lūn khi toh-lóh, Iâ-hô-hoa hō· i khah-iāⁿ.

¹⁵Tāi-pit choē Í-sek-liát chēng-lāng ê ông. Tāi-pit péng-kong kiāⁿ-gī tī i ê chēng peh-siⁿ. ¹⁶Sé-ló-ngá ê kiáⁿ Iok-ap choē kun-tiúⁿ; A-hi-lút ê kiáⁿ Iok-sa-hoat choē sú-koaⁿ. ¹⁷A-hi-tút ê kiáⁿ Sat-tok kap A-pí-a-tha ê kiáⁿ A-hi-bí-lék choē chè-si; Se-lâi-ngá choē su-kì; Iâ-hô-iâ-tāi ê kiáⁿ Pí-ná-ngá thóng-hat Ki-lī-thê lāng, kap Pí-lí-thê lāng; Tāi-pit hiah ê

kiáⁿ choē léng-siū.

⁹Tāi-pit m̄ng kóng, Sò-lô ê ke iáu ū chhun lāng bô, goá thang in-ūi Iok-ná-tan ê iân-kò· lâi si-un hō· i? ²Sò-lô ê ke ū chit ê lô-pók, miâ kiò Sé-pa, lāng kiò i khi Tāi-pit hia; ông chiū kā i kóng, Lí sī Sé-pa mah? ³Īn kóng, Lí ê lô-pók chiū-sī i. Ông kóng, Sò-lô ê ke iáu ū lāng bô, goá thang chiong Siōng-tè ê un si hō· i? ⁴Sé-pa tùi ông kóng, Iok-ná-tan iáu ū chit ê kiáⁿ, sī pái-kha ê. Ông kā i kóng, I tī toh-lóh? Sé-pa in ông kóng, I tī Lô-tí-pa A-bí-lī ê kiáⁿ Má-kiat ê ke. ⁵Tāi-pit ông chiū chhe lāng khi, tùi Lô-tí-pa A-bí-lī ê kiáⁿ Má-kiat ê ke toà i lâi. ⁶Sò-lô ê sun, Iok-ná-tan ê kiáⁿ, Bí-hui-pho-siat lâi kìⁿ Tāi-pit, phak--lòh-khi pài. Tāi-pit kóng, Bí-hui-pho-siat ah. I in kóng, Lí ê lô-pók tī chia. ⁷Tāi-pit kóng, Lí bôh-tit kiaⁿ, goá beh in-ūi lí ê pē Iok-ná-tan ê iân-kò· si-un hō· lí; goá beh chiong lí ê kong Sò-lô it-chhè ê chhân-hūng lóng hēng lí; lí iā beh siông-siông tī goá ê toh saⁿ-kap chiah. ⁸I koh phak--teh pài i, kóng, Lí ê lô-pók sī sim-mih ah? sī chhin-chhiūⁿ chit chiah sí-káu, lí keng-jian khoàⁿ-kò· goá ah.

⁹Ông kiò Sò-lô ê lô-pók Sé-pa lâi, kā i kóng, Goá í-keng chiong siók Sò-lô kap i choân-ke--ê lóng hō· lí ê chú-lāng ê kiáⁿ. ¹⁰Lí kap lí hiah ê kiáⁿ, lí hiah ê lô-pók, tiòh kā i chēng-choh chhân-hūng, toà só· chhut-sán-ê hō· lí ê chú ê kiáⁿ ū mih thang chiah; chóng-sī lí ê chú-lāng ê kiáⁿ Bí-hui-pho-siat beh siông-siông tī goá ê toh saⁿ-kap chiah. ¹¹Sé-pa ū chap-gō· ê kiáⁿ, jī-chap ê lô-pók. Sé-pa tùi ông kóng, Kìⁿ goá ê chú goá ê ông só· hoan-hù lô-pók ê, lí ê lô-pók lóng beh chiàu án-ni kiáⁿ. Ông koh kóng, Bí-hui-pho-siat beh tī goá ê toh saⁿ-kap chiah, chhin-chhiūⁿ ông ê kiáⁿ chit-iūⁿ. ¹²Bí-hui-pho-siat ū chit ê kiáⁿ

iáu soè-hàn, miâ kiò Bí-ka. Kìⁿ-nā toà tī Sé-pa ê ke ê lāng, lóng choè Bí-hui-pho-siat ê lô-pók. ¹³

Tùi án-ni Bí-hui-pho-siat tiàm tī Iâ-lō-sat-léng; in-ūi i siông-siông tī ông ê toh saⁿ-kap chiáh; koh i nng-kha lóng pái.

10 Chit-tiáp í-āu, A-bûn lāng ê ông sí, i ê kiáⁿ Hap-lùn soà-chiap i choè ông. ²Tāi-pit kóng, Goá beh si-un hō Ná-hat ê kiáⁿ Hap-lùn, chhin-chhiūⁿ i ê lāu-pē si-un hō goá chit-iūⁿ. Tāi-pit chiū chhe jîn-sîn, thok-tiông in an-ùi i sí lāu-pē. Tāi-pit ê jîn-sîn kàu A-bûn lāng ê keng-lāi. ³Chóng-sī A-bûn lāng ê siú-léng chhe lāng kā in ê chú Hap-lùn kóng, Tāi-pit chhe lāng lâi lí chia ùi-bûn lí, lí phah-sng i sī chun-keng lí ê pē mah? Tāi-pit chhe i ê jîn-sîn, kiám-m-sī beh cheng-tham chit ê siáⁿ, siông-sè khoàⁿ lâi chia-tó i mah? ⁴Hap-lùn chiū chiong Tāi-pit ê jîn-sîn ê chhui-chhiu thì chit-poàⁿ, koh tui-tiong koah-tng i ê saⁿ, kàu toā-thúi-téng, chhe in tò--khì. ⁵Ū lāng kā Tāi-pit kóng. I chiū chhe lāng khi ngiā-chih in, in-ūi hiah ê lāng kiàn-siàu kàu-kék. Ông kóng, Thang tiàm tī Iâ-lī-ko theng-hāu chhui-chhiu hoat-tng, chia tò--lâi.

⁶A-bûn lāng chai in hō Tāi-pit iām-òⁿ; A-bûn lāng chiū chhe lāng khi chiaⁿ Pek-lī-háp ê A-lân lāng, kap Só-pa ê A-lân lāng, pō-peng nng-bān, kap Má-ka ông ê lāng chit-chheng. Tô-pek lāng chit-bān nng-chheng. ⁷Tāi-pit thiaⁿ-kìⁿ, chiū chhe Iok-ap chhoā ióng-sū choân-kun. ⁸A-bûn lāng chhut-lâi pài-tin tī siáⁿ-mng-kháu; Só-pa kap Lī-háp ê A-lân lāng, Tô-pek lāng, kap Má-ka lāng, lēng-goā pài-tin tī kau-ia. ⁹Iok-ap khoàⁿ-kìⁿ cheng-āu ū tui-ték pài-tin, chiū tui Í-sek-liát cheng-peng ê tiong-kan koh-chài keng i lâi pài-tin, tí-ték A-lân lāng; kī-ū ê peh-siⁿ

kau i ê sió-tī A-pí-su, hō i pài-tin tí-ték A-bûn lāng. ¹¹Koh kóng, Nā A-lân lāng khah-kiông goá, lí chiū lâi pang-chān goá; nā A-bûn lāng khah-kiông lí, goá chiū khi pang-chān lí. ¹²Tiōh ióng-kám, lán tiōh ūi lán ê peh-siⁿ kap lán Siōng-tè ê siáⁿ choè tui-tiōng-hu; goān Iâ-hô-hoa chiàu I sóⁿ khoàⁿ-choè hó-ê lâi kiāⁿ. ¹³Tùi án-ni Iok-ap kap tè i ê peh-siⁿ chhin-cheng kap A-lân lāng kau-chiàn; in chiū tī i ê bîn-cheng tô-cháu. ¹⁴A-bûn lāng khoàⁿ-kìⁿ A-lân lāng tô-cháu, in iā tī A-pí-su ê bîn-cheng cháu jip siáⁿ. Iok-ap chiū tui A-bûn lāng hia tò-khì, kàu Iâ-lō-sat-léng.

¹⁵A-lân lāng khoàⁿ-kìⁿ in thài-su tī Í-sek-liát lāng ê bîn-cheng, chiū koh chū-chip. ¹⁶Hap-tāi-tí-siā chhe lāng tiâu Hô-goā ê A-lân lāng chhut-lâi; in kàu Hi-lân; Hap-tāi-tí-siā ê kun-tiúⁿ Sok-hoat chhoā in. ¹⁷Ū lāng pò Tāi-pit chai; i chiū chū-chip Í-sek-liát cheng-lāng, kè Iok-tàn hô lâi kàu Hi-lân; A-lân lāng pài-tin kong-kek Tāi-pit, kap i kau-chiàn. ¹⁸A-lân lāng tô-cháu tī Í-sek-liát ê bîn-cheng; Tāi-pit thài-sí A-lân chhit-pah tiuⁿ chiàn-chhia ê peng, bé-peng si-bān; koh phah in ê kun-tiúⁿ Sok-hoat, hō i sí tī-hia. ¹⁹Hāng-hók Hap-tāi-tí-siā hiah ê ông khoàⁿ-kìⁿ in thài-su tī Í-sek-liát ê bîn-cheng, chiū kap Í-sek-liát hô-hó, lâi hāng-hók in. Tùi án-ni A-lân lāng m̄-káⁿ koh pang-chān A-bûn lāng.

11 Nī-thâu, liát-ông chhut-chiàn ê sī, Tāi-pit chhe Iok-ap kap i ê jîn-sîn, kap Í-sek-liát ê cheng-lāng, chhut-khì; in chiū thài-iāⁿ A-bûn lāng, ūi-kong Lāh-pa. Tāi-pit iū-goān tiàm tī Iâ-lō-sat-léng.

²Ū chit-jit beh àm ê sī, Tāi-pit tui chhng-nih khí-lâi, tī ông-kiong ê chhui-téng kiāⁿ-lâi kiāⁿ-khì; tui chhui-téng khoàⁿ-kìⁿ chit ê hū-jîn-lāng teh soé-ék; hū-jîn-lāng siⁿ-choè

chin-súi. ³Tāi-pit ūi-tiòh hit ê hū-jîn-lâng chiū chhe lāng khi thām-thiaⁿ; ū lāng kóng, I kiám-m̄-sī Í-liân ê cha-bó·-kiáⁿ, Hek-lāng O·lī-à ê bó·, Poát-sī-pa mah? ⁴Tāi-pit chhe sù-chiá khi chhoā i lāi, i chiū lāi kàu i hia, Tāi-pit kap i tâng-pāng; (hū-jîn-lāng chheng-khi i ê bô chheng-khi;) chiū tò-khi in chhù. ⁵Hū-jîn-lāng hoai-īn, chhe lāng kā Tāi-pit kóng, Goá í-keng hoai-īn. ⁶Tāi-pit chhe lāng kàu Iok-ap hia, kóng, Lí chhe Hek-lāng O·lī-à lāi goá chia. Iok-ap chiū chhe O·lī-à khi kìⁿ Tāi-pit. ⁷O·lī-à í-keng lāi i hia, Tāi-pit m̄ng-khoàⁿ Iok-ap hó mah? peh-siⁿ hó mah? kau-chiàn hó-sè mah? ⁸Tāi-pit kā O·lī-à kóng, Lí lōh-khi lín tau soé-kha. O·lī-à chhut ông-kiong liáu-āu, ông chiū sàng chit-hūn chiáh-mih hō· i. ⁹Chóng-sī O·lī-à kap i chú-lāng ê lô·pók saⁿ-kap khùn tī ông-kiong ê m̄ng-kháu, bô lōh-khi in tau. ¹⁰Ū lāng kā Tāi-pit kóng, O·lī-à bô lōh-khi i ê chhù. Tāi-pit chiū m̄ng O·lī-à kóng, Lí kiám-m̄-sī tui h̄ng-lō· lāi mah? siáⁿ-sū m̄ lōh-khi lí ê ke ah? ¹¹O·lī-à tui Tāi-pit kóng, Iok-kūi kap Í-sek-liát kap Iū-tāi lóng tiàm tī chháu-liáu-á; goá ê chú Iok-ap, kap goá ê chú ê lô·pók, lóng chat-iāⁿ tī chhân-iá; goá kiám thang tò--khi goá ê ke lim-chiáh, kap goá ê bó· saⁿ-kap khùn mah? goá chí lí ê oáh, kap lí lēng-hūn ê oáh lāi chiū-choā, goá koat-toàn bô beh kiāⁿ chit ê sū. ¹²Tāi-pit kā O·lī-à kóng, Lí kin-á-jit iū-goân toà chia, bîn-á-chài goá hō· lí khi. O·lī-à chiū tī hit-jit kap tē-jī jit toà tī Iā-lō·sat-léng. ¹³Tāi-pit kiò O·lī-à lāi, i chiū tī i ê bīn-chēng lim-chiáh; i hō· i chui; í-keng àm, O·lī-à chhut-khi i ê chhng--nih khùn, kap i ê chú chia ē lô·pók saⁿ-kap choē-phoāⁿ; iā bô lōh-khi in tau.

¹⁴Keh chá-khí Tāi-pit siá chit tiuⁿ phoe hō· Iok-ap, thok O·lī-à ê chhiú toà--khi. ¹⁵Phoe-

lāi siá kóng, Tiòh phái O·lī-à tī tīn-chēng kék gūi-kip ê só·-chāi, lín chiū tui i ê āu-bīn thē-lāi, hō· i siū phah-sí. ¹⁶Iok-ap ūi-siāⁿ ê sī, tī i só· chai ū íong-sū ê só·-chāi, chiū phái O·lī-à tī-hia. ¹⁷Siāⁿ-lāi ê lāng ū chhut-lāi kap Iok-ap kau-chiàn; Tāi-pit ê lô·pók sí kúi-nā lāng, Hek-lāng O·lī-à iā sí. ¹⁸Iok-ap chhe lāng ēng kau-chiàn ê sū lóng kā Tāi-pit kóng; chiū hoan-hù sù-chiá kóng, Lí ēng kau-chiàn it-chhē ē sū kā ông kóng bēng-pék, ông nā siū-khi, kā lín kóng, Lín kau-chiàn ê sī, siáⁿ-sū pek-kūn siāⁿ-chhiūⁿ? kiám m̄-chai in oē tui siāⁿ-téng siā-chiⁿ mah? ²¹Chēng phah-sí Iā-lō·pí-siat ê kiáⁿ A-pí-bí-lék-ê sī chī-chui? kiám-m̄-sī chit ê hū-jîn-lāng, tui chhiūⁿ-téng hiat chiòh-bō ē téng-tún tī i ê téng-bīn, hō· i sí tī Thē-pī-su mah? lín siáⁿ-sū pek-kūn siāⁿ ah? lí tiòh kóng, Lí ê lô·pók Hek-lāng O·lī-à iā sí.

²²Sù-chiá khi, chiàu Iok-ap it-chhē só· bēng-lēng-ê lāi kā Tāi-pit kóng. ²³Sù-chiá kā Tāi-pit kóng, Tui-ték pí goán khah-kiong, chhut-lāi kau-iá kong-kek goán, goán phah i kàu siāⁿ-m̄ng-kháu. ²⁴Siā-chiⁿ ê lāng tui chhiūⁿ-téng siā lí ê lô·pók; ông ê lô·pók sí kúi-nā lāng, lí ê lô·pók Hek-lāng O·lī-à iā sí. ²⁵Tāi-pit kā hit ê sù-chiá kóng, M̄-bián khoà-lū chit ê sū, in-ūi to-kiām thāi-sí lāng, chit-ê hit-ê bô it-tēng; lí tiòh koh-khah chīn-lát kong-siāⁿ, lāi chia-tó i; tiòh án-ni bián-lē i. ²⁶O·lī-à ê bó· thiaⁿ-kìⁿ tiōng-hu O·lī-à í-keng sí, chiū ūi i ê tiōng-hu thi-khau. ²⁷Teng-iu í-keng bēng-pék, Tāi-pit chhe lāng chhoā i kàu kiong-lāi; i chiū choē i ê bó·, kā i siⁿ chit ê kiáⁿ. Chóng-sī Tāi-pit só· kiāⁿ ê sū, Iā-hō-hoa chin bô hoaⁿ-hí.

12 Iā-hō-hoa chhe Ná-tan khi kìⁿ Tāi-pit; i kàu i hia, kā i kóng, Tī chit ê siāⁿ ū n̄ng-lāng,

chít-ê hó-giáh, chít-ê sòng-hiong. ²Hó-giáh-ê ũ gū iūⁿ chín-choē; sòng-hiong lāng bô sím-mih, chí-ū chít chiaⁿ iūⁿ-chéng-á, chiū-sī i só· boé lāi chhī ê, i kap i tī-hia, kap i ê kiáⁿ saⁿ-kap tióng-toā, chiáh i só· chiáh-ê, lim i ê poe, khùn tī i ê heng-chêng, khoàⁿ i chhin-chhiūⁿ ka-kī ê cha-bó·-kiáⁿ. ⁴Ū chít ê chhut-goā lāng kàu hó-giáh lāng hia, hó-giáh lāng m̄-kam tui i ê iūⁿ-kún gū-kún chhú lāi pī-pān hō· lāng-kheh chiáh; hoán-túg chhú sòng-hiong lāng ê iūⁿ-á, pī-pān lāi hō· lāng-kheh chiáh. ⁵Tāi-pit toā siū-khi hit-lāng, kā Ná-tan kóng, Goá kí éng-oáh ê Iâ-hô-hoa lāi chiū-choā, kiáⁿ chit ê tāi-chi ê lāng tióh sí; ⁶tióh pē i ê iūⁿ-á sì-pē; in-ūi i kiáⁿ chit ê sū, iā in-ūi i bô lín-bín ê sim.

⁷Ná-tan kā Tāi-pit kóng, Lí chiū-sī hit-lāng. Iâ-hô-hoa Í-sek-liát ê Siōng-tè án-ni kóng, Goá ēng iū boah lí choē Í-sek-liát ê ông, kiū lí thoat-lī Sò-lô ê chhiú. ⁸Goá koh ēng lí ê chú ê chhù-thēh hō· lí, ēng lí ê chú hiah ê bó· kau tī lí ê heng-chêng; koh ēng Í-sek-liát kap Iū-tāi ke hō· lí; chiaⁿ-ê nā iáu liáh-choē sió-khoá, Goá oē ke-thiⁿ chit-hō hit-hō hō· lí. ⁹Lí siáⁿ-sū khoàⁿ-khin Iâ-hô-hoa ê bēng-lēng, kiáⁿ I só· khoàⁿ-choē pháiⁿ ê sū? lí ēng to thāi-sí Hek-lāng O·lī-à, chiū-sī chioh A-bún lāng ê to thāi-sí i, koh chhoā i ê bó· choē lí ê bó·. ¹⁰Taⁿ to-kiám beh éng-oán bô lī-khui lí ê ke, in-ūi lí khoàⁿ-khin Goá, chhoā Hek-lāng O·lī-à ê bó· choē lí ê bó·. ¹¹Iâ-hô-hoa koh án-ni kóng, Khoàⁿ ah, Goá beh tui lí ê ke heng-khi chai-ē kong-kek lí; Goá beh tī lí ê bák-chiu-chêng, ēng lí hiah ê bó· hō· lí ê chhù-piⁿ, i beh tī chheng-thian pék-jit kap lí hiah ê bó· tâng-pāng. ¹²In-ūi lí tī àm-tiong kiáⁿ i, chóng-sī Goá beh tī chheng-thian pék-jit, tī Í-sek-liát chêng-lāng ê bīm-chêng, kiáⁿ

chit ê sū. ¹³Tāi-pit kā Ná-tan kóng, Goá ũ tek-choē Iâ-hô-hoa. Ná-tan kā Tāi-pit kóng, Iâ-hô-hoa í-keng tū-khi lí ê choē, lí boē tì-kàu sí. ¹⁴Chóng-sī in-ūi lí kiáⁿ chit ê sū, hō· Iâ-hô-hoa ê tui-ték ũ siat-tók ê in-iū, só·-í i kā lí só· siⁿ ê kiáⁿ tek-khak sí. ¹⁵Ná-tan chiū tò-khi in chhù.

Iâ-hô-hoa phah O·lī-à ê bó· kā Tāi-pit só· siⁿ ê eⁿ-á, i chiū phò-piⁿ chín siong-tiōng. ¹⁶Tāi-pit chiū ũi-tiōh hit ê kiáⁿ kī-tó Siōng-tè. Tāi-pit koh kìm-chiáh, jip lāi-bín thông-mí tó tī toē--nih. ¹⁷I ke-tiong hiah ê lâu-lāng khí-lāi, kàu i ê sin-piⁿ, beh hū i tui toē khí-lāi; chóng-sī i m̄-khéng, iā bô beh kap in saⁿ-kap chiáh. ¹⁸Kàu tē-chhit jít gín-ná sí; Tāi-pit ê jîn-sîn m̄-káⁿ kā i kóng gín-ná sí lah; in-ūi in kóng, Gín-ná iáu oáh-teh ê sí, lán khng i, i siōng-chhiáⁿ m̄-thiaⁿ lán ê oē, nā kā i kóng gín-ná sí, i siong-sim beh kàu cháiⁿ-iūⁿ? ¹⁹Tāi-pit khoàⁿ-kìⁿ i ê jîn-sîn chī-bú-chī-chū teh kóng, Tāi-pit chiū chai gín-ná í-keng sí. Tāi-pit chiū m̄ng i ê jîn-sîn kóng, Gín-ná sí--lah mah? In kóng, Sí--lah. ²⁰Tāi-pit chiū tui toē--nih khí-lāi, soé sin-khu, boah iū, oāⁿ-saⁿ, jip Iâ-hô-hoa ê tiān kèng-pài; jiān-āu tò-khi i ê chhù. I hoan-hù lāng pāi mih tī i ê bīm-chêng, i chiū chiáh. ²¹Jîn-sîn m̄ng i kóng, Lí só· kiáⁿ--ê sī cháiⁿ-iūⁿ? Gín-ná oáh--teh ê sí, lí kìm-chiáh thī-khàu; gín-ná sí, lí hoán-túg khí-lāi chiáh. ²²Tāi-pit kóng, Gín-ná iáu oáh--teh, goá kìm-chiáh thī-khàu, in-ūi goá phah-sng kóng, Kiám-chhai Iâ-hô-hoa lín-bín goá, hō· gín-ná oáh--teh, iā káⁿ. ²³Gín-ná í-keng sí, goá kìm-chiáh beh siáⁿ-sū? goá kiám oē hō· i tò-túg--lāi mah? goá beh khi i hia, i boē-oē lāi goá chia. ²⁴Tāi-pit an-ūi i ê bó· Poát-sī-pa, jip--khi kap i tâng-pāng, i chiū siⁿ-kiáⁿ; chiū kā i hō-miā kiò Só·-lô-bún; ²⁵Iâ-hô-

hoa iā thiàⁿ i, chiū thok sian-ti Ná-tan kā i hō miā kiò Iā-tí-tí-a, in-ūi Iā-hō-hoa thiàⁿ i.

²⁶Iok-ap kong A-bûn lāng ê Láh-pa, chhú in ê kiaⁿ-siāⁿ. ²⁷Iok-ap chhe sù-chiá khi kìn Tāi-pit kóng, Goá kong Láh-pa, í-keng chhú i ê chú-i-siāⁿ. ²⁸Taⁿ lí tiòh chū-chíp kî-û ê peh-sìⁿ lâi, chat-iāⁿ kong chit ê siāⁿ lâi chhú i; kiaⁿ-liáu goá chhú chit ê siāⁿ, lāng chiū ēng goá ê miā lâi kiò i. ²⁹Tāi-pit chiū chū-chíp cheng peh-sìⁿ, khi Láh-pa kong-kek, lâi chhú i. ³⁰I chhú in ê ông thâu-khak-téng ê bián-liú, i ê kim tâng chit tha-liân-tek, koh siuⁿ pó-chiòh; chiong chit-ê lâi tì tī Tāi-pit ê thâu-khak. I koh tui siāⁿ-lâi chhú chin-choē chài-bút. ³¹Koh liáh hiah ê siāⁿ ê peh-sìⁿ chhut-lâi, hō· in ēng kù-á, kap thih-pē, í-kip thih ê pó-thâu choē khó-kang, á-sī tī hiā-iô tiòh-boā; i khoán-thāi A-bûn lāng hiah ê siāⁿ lóng sī án-ni. Tāi-pit chiū kap cheng peh-sìⁿ tò-khi Iā-lō·sat-léng.

13 Chit-ê í-āu Tāi-pit ê kiáⁿ Ap-sa-liông ū chit-ê chin-súi ê sió-bē, miā kiò Tha-má; Tāi-pit ê kiáⁿ Âm-lùn thiàⁿ i. ²Âm-lùn ū tiòh i ê sió-bē Tha-má ut-chut kàu phò-pīⁿ; in-ūi i sī chāi-sek-lú, Âm-lùn ka-kī chai oh-tit tui i choē sím-mih tãi-chì. ³Âm-lùn ū chit ê pêng-iú, miā kiò Iok-ná-tát, sī Tāi-pit ê hiaⁿ Sī-bí-a ê kiáⁿ. Iok-ná-tát sī chin lêng-khiàu ê lāng. ⁴I tui Âm-lùn kóng, Ông ê kiáⁿ ah, lí siáⁿ-sū chit-jit chit-jit khah siau-sán ah? siáⁿ-sū m̄ kā goá kóng? Âm-lùn kā i kóng, Goá thiàⁿ goá ê sió-tī Ap-sa-liông ê sió-bē Tha-má. ⁵Iok-ná-tát kā i kóng, Lí tiòh tó tī bîn-chhng-nih, kè-choē phò-pīⁿ; lí ê lāu-pē lâi khoàⁿ lí, chiū tui i kóng, Kiū lí chún goá ê sió-bē Tha-má lâi goá chia, ēng chiáh-mih hō· goá, pī-pān tī goá ê bîn-chêng, hō· goá khoàⁿ-kìⁿ, tui i ê chhiú chih lâi chiáh. ⁶Âm-lùn chiū tó-

teh ké phò-pīⁿ; ông lâi bāi i. Âm-lùn chiū tui ông kóng, Kiū lí hō· goá ê sió-bē Tha-má lâi, tī goá ê bîn-chêng kā goá choē nng tè piáⁿ, goá thang tui i ê chhiú chih lâi chiáh i.

⁷Tāi-pit chiū chhe lāng kàu Tha-má ê chhù, kā i kóng, Taⁿ lí khi lí ê hiaⁿ Âm-lùn ê chhù, kā i pī-pān chiáh-mih. ⁸Tha-má chiū kàu i ê hiaⁿ Âm-lùn ê chhù; Âm-lùn tó-teh. Tha-má thêh mī-hún, tī i ê bîn-chêng chhiau choē piáⁿ, koh pek hiah ê piáⁿ; ⁹chiū chiong chian-poāⁿ piáⁿ tī i ê bîn-chêng. Âm-lùn m̄ chiáh, chiū kóng, Chêng-lāng tiòh lī-khui goá chhut-khi; chêng-lāng chiū lī-khui i chhut-khi. ¹⁰Âm-lùn kā Tha-má kóng Lí phang chiáh-mih jip khùn-pāng, goá thang tui lí ê chhiú chih lâi chiáh. Tha-má chiū phang só· choē ê piáⁿ jip khùn-pāng kàu i ê hiaⁿ Âm-lùn hia. ¹¹I phang khi hō· i chiáh, i chiū khiú i, kā i kóng, Goá ê sió-bē ah, lí lâi kap goá saⁿ-kap khùn. ¹²I kā i kóng, Goá ê hiaⁿ, m̄-thang, bôh-tit lêng-jiók goá, in-ūi tī Í-sek-liat tiong m̄-eng-kai án-ni kiáⁿ; lí bôh-tit choē chit ê gōng-sū; iā goá, goá beh cháiⁿ-iūⁿ soé goá ê kiàn-siàu? iā lí, lí tī Í-sek-liat choē gōng-lāng ê chit-ê; taⁿ chhiáⁿ lí tui ông kóng, i bô beh kìm-chí goá kè hō· lí. ¹⁴Chóng-sī Âm-lùn m̄ khéng thiaⁿ i ê oē; in-ūi i pí i khah ū lát, chiū lêng-jiók i, kap i saⁿ-kap khùn.

¹⁵Í-āu Âm-lùn kék-kí oàn-hūn i; hit ê oàn-hūn i ê oàn-hūn, pí chêng thiàⁿ i ê thiàⁿ koh khah-toā. Âm-lùn chiū kā i kóng, Khí-lâi, khi ah. ¹⁶I kā i kóng, M̄-thang án-ni, lí koáⁿ goá chhut-khi ê hāi-tiòh goá, pí lí chêng khoán-thāi goá-ê khah-thiám. Chóng-sī Âm-lùn m̄ khéng thiaⁿ i; ¹⁷chiū kiò hit ê su-hāu i ê lô·pók kóng, Tiòh koáⁿ chit ê cha-bó·-gín-ná tui goá chia chhut-khi; i chhut-khi, m̄ng chiū tiòh chhoàⁿ. ¹⁸Hit-sī Tha-má chhēng chhái-sek ê

saⁿ, in-ūi ông ê cha-bó·-kiáⁿ, iáu-bē chhut-kè ê, lóng chhēng chit hō saⁿ; Âm-lùn ê lô·-pók chiū khan i chhut-khì; chhut-khì liáu, mng chiū chhoàⁿ--teh. ¹⁹Tha-má sám hé-hu tī thâu-khak, thiah-lìh só· chhēng chhái-sek ê saⁿ, ēng chhiú phō thâu-khak lâi kiáⁿ; ná-kiāⁿ ná-háu. ²⁰I ê hiaⁿ Ap-sa-liông mng i kóng, Lí ê hiaⁿ Âm-lùn bat kap lí choè-tui mah? Goá ê sió-bē ah, taⁿ bô choè siaⁿ, i sī lí ê hiaⁿ, bôh-tit khoà·i chit ê sū. Tha-má chiū toaⁿ-sin tiàm tī i ê hiaⁿ Ap-sa-liông ê chhū. ²¹Tāi-pit ông thiaⁿ-kìⁿ chiah ê sū, chiū put-chí siū-khì. ²²Ap-sa-liông bô kap Âm-lùn kóng-hó kóng-pháiⁿ; in-ūi Ap-sa-liông oàn-hūn Âm-lùn, sī i ū lêng-jiók i ê sió-bē Tha-má.

²³Kè nng-ni, Ap-sa-liông tī kùn Í-hoat-liân ê Pa-lék-hā-só, ū lāng kā i chián iūⁿ-mng; Ap-sa-liông chhiáⁿ ông ê cheng-kiáⁿ lóng-chóng khì. ²⁴Ap-sa-liông lâi kìⁿ ông, kóng, Taⁿ lí ê lô·-pók ū ēng lāng teh chián iūⁿ-mng, chhiáⁿ ông, kap ông ê jîn-sîn, kap lô·-pók, saⁿ-kap khì. ²⁵Ông kā Ap-sa-liông kóng, Goá ê kiáⁿ ah, m̄-thang, goán m̄-thang lóng khì, kiaⁿ-liáu lí khai-huì siuⁿ siong-tiōng. Ap-sa-liông pek i, chóng-sī i m̄-khì; kan-ta kā i chiok-hok. ²⁶Ap-sa-liông kóng, Nā bô, chiū hō· goá ê hiaⁿ Âm-lùn kap goán khì. Ông kóng, Siáⁿ-sū tiōh i kap lí khì ah? ²⁷Ap-sa-liông pek i. Ông chiū ún-chún Âm-lùn kap ông ê cheng-kiáⁿ saⁿ-kap khì. ²⁸Ap-sa-liông hoan-hù i ê lô·-pók kóng, Lín tiōh chū·i, khoàⁿ Âm-lùn lim-chiú tek-kái ê sī, goá kā lín kóng, Phah Âm-lùn, lín chiū tiōh thāi-sí i. bôh-tit kiaⁿ; che kiám-m̄-sī goá hoan-hù lín--ê mah? Lín choè lín hó-táⁿ ióng-kám. ²⁹Ap-sa-liông ê lô·-pók chiū chiàu Ap-sa-liông só· hoan-hù ê, lâi kiāⁿ tī Âm-lùn; ông ê cheng-kiáⁿ lóng peh--khí-lâi, ták-lāng khiā i ê lô·-tô-cháu. ³⁰In iáu tī

lō·--nih ū hong-siaⁿ thoân kàu Tāi-pit, kóng, Ap-sa-liông ū thāi-sí ông ê cheng-kiáⁿ, bô lâu chit-ê. ³¹Ông chiū khí--lâi thiah-lìh saⁿ, tó tī toē--nih; ông ê jîn-sîn iā thiah-lìh saⁿ, khiā tī i ê sin-piⁿ. ³²Tāi-pit ê hiaⁿ Sī-bí-a ê kiáⁿ, Iok-ná-tát in kóng, Goá ê chú, bôh-tit phah-sng ông ê cheng-kiáⁿ, hiah ê siāu-liân lāng lóng hō· i thāi-sí; chí-ū Âm-lùn sí nā-tiāⁿ; in-ūi tui Âm-lùn lêng-jiók i ê sió-bē Tha-má hit-jit, Ap-sa-liông chiū í-keng ū chit ê ì-sù. ³³Taⁿ goá ê chú goá ê ông, bôh-tit khoà·i chit ê sū, phah-sng ông ê cheng-kiáⁿ lóng sí; kī-sit chí-ū Âm-lùn sí nā-tiāⁿ. ³⁴Ap-sa-liông chiū tô-cháu. Siú-bāng ê siāu-liân lāng kiāh-bāk khoàⁿ, khoàⁿ-kìⁿ choē-choē peh-siⁿ tui i ê āu-bīn, tui soaⁿ-piⁿ ê lô·-lâi. ³⁵Iok-ná-tát kā ông kóng, Khoàⁿ ah, ông ê cheng-kiáⁿ lóng lâi lah, kó-jian chiàu lí ê lô·-pók só· kóng ê. ³⁶Oē tú-á kóng-soah, ông hiah ê kiáⁿ chiū kàu, khui-siaⁿ thī-khau; ông kap jîn-sîn iā lóng toā thī-khau kàu-kék. ³⁷Ap-sa-liông cháu kàu Ki-sút ông A-bí-hut ê kiáⁿ Tāt-mái hia; Tāi-pit jit-jit ūi-tiōh i ê kiáⁿ pi-ai. ³⁸Ap-sa-liông cháu kàu Ki-sút, tiàm hia saⁿ-nī. ³⁹Tāi-pit ông ê sim chhiat-chhiat siāu-liām Ap-sa-liông; in-ūi Âm-lùn í-keng sí, chiū siū an-ùì.

14 Sé-ló·-ngá ê kiáⁿ Iok-ap chai ông ê sim ì-hiōng Ap-sa-liông; ²chiū chhe lāng khì Thē-ko-a, tui hia kiò chit ê chhang-miā ê hū-jîn-lāng lâi, kā i kóng, Chhiáⁿ lí ké-choē khiā-hà-ê, chhēng hà-saⁿ, bôh-tit ēng iū boah seng-khu, tiōh chng-choē ūi-tiōh sí-lāng kú-kú pi-ai ê hū-jîn-lāng; ³jip-khì kìⁿ ông, chiàu chit ê khoán tui i án-ni kóng. Iok-ap chiū chiong só· tiōh kóng ê oē kā hū-jîn-lāng kóng. ⁴Thē-ko-a ê hū-jîn-lāng tui ông kóng ê sī, bīn phak tī toē--nih, pài kóng, Ông ah, kiù goá. ⁵Ông mng i kóng, Lí ū sim-mih tāi-chi ah? I in

kóng, Goá sít-chāi sī koáⁿ-hū, goá ê tiōng-hu í-keng sí. ⁶Lú-pī ū nng ê kiáⁿ, in nng-ê tī chhân--nih saⁿ-pah, bô lâng tī in tiong-kan pài-kái; chit-ê pah hit-ê hō· i sí. ⁷Taⁿ choân-ke ê lâng lóng khí-lâi kong-kek lí ê lú-pī, kóng, Lí tiōh chiong hit ê pah-sí hiaⁿ-tī-ê kau--chhut-lâi, goán thang hō· i sí, pē i pah-sí hiaⁿ-tī ê sīⁿ-miā, choát i ê hō·-sū; án-ni in beh chiong goá chhun ê hé-thoàⁿ pah-hoa, bô hō· goá ê tiōng-hu lâu-miā lâu hō·-ê tī sè-kan. ⁸Ông ká hū-jîn-lâng kóng, Lí thang tò-khì lín tau, goá beh ūi-tiōh lí chhut bēng-lēng. ⁹Thē-ko-a ê hū-jîn-lâng koh ká ông kóng, Goá ê chú goá ê ông, goān chit ê choē kui tī goá, kap goá ê pē ê ke; ông kap i ê ūi lóng bô choē. ¹⁰Ông kóng, Kìⁿ-nā ū kap lí ke-kóng oē ê, lí chiū chhoā i kàu goá chia, i chiū bô koh lâi káng lí. ¹¹Hū-jîn-lâng kóng, Goān ông kì-liām Iâ-hô-hoa lí ê Siōng-tè, m̄-thang chún pò-jîn-bēng-ê kiáⁿ biát-choát kiaⁿ-liáu in biát-choát goá ê kiáⁿ. Ông kóng, goá kí éng-oah ê Iâ-hô-hoa lâi chiū-choā, lí ê kiáⁿ, liân chit ki thâu-m̄ng iā boē ka-lauh tī toē--nih.

¹²Hū-jîn-lâng kóng, Kiū lí iōng-ún lí ê lú-pī tui goá ê chú goá ê ông koh kóng chit kù oē. Ông kóng, Choē lí kóng. ¹³Hū-jîn-lâng kóng, Lí siáⁿ-sū siūⁿ án-ni lâi kong-kek Siōng-tè ê peh-siⁿ ah? Ông kóng chit ê oē, chhin-chhiūⁿ ū-choē, in-ūi ông bô hō· i ê tô-miā-ê tò--lâi. ¹⁴In-ūi lán lóng tek-khak tiōh sí, chhin-chhiūⁿ chúí phoah tī toē--nih, boē-oē koh siu tò-tng; chóng-sī Siōng-tè bô chhiūⁿ lâng ê sīⁿ-miā, sī siat-hoat hō· tô-miā ê lâng bián siū kek-tiōk lī-khui I. ¹⁵Goá lâi chiong chit ê oē ká goá ê chú goá ê ông kóng, sī in-ūi peh-siⁿ hō· goá kiaⁿ-hiāⁿ, só·-í lú-pī kóng, Taⁿ goá beh ká ông kóng, kiám-chhái ông beh chiáⁿ lú-pī ê só· kiū. ¹⁶Lâng beh chiong goá kap goá ê kiáⁿ

tui Siōng-tè ê giáp choē chit-ê tô-biát; chóng-sī ông beh thiaⁿ, kiū i ê lú-pī thoat-lī hit-lâng ê chhiú. ¹⁷Lú-pī koh kóng, Goān goá ê chú goá ê ông ê oē lâi an-ùi; in-ūi goá ê chú goá ê ông oē hun-piat sī-hui, chhin-chhiūⁿ Siōng-tè ê sū-chiá chit-iūⁿ; tòk-tòk goān Iâ-hô-hoa lí ê Siōng-tè kap lí tī-teh.

¹⁸Ông in hū-jîn-lâng ká i kóng, goá kìⁿ-nā só· beh m̄ng lí ê, lóng m̄-thang tui goá khng-bát. Hū-jîn-lâng kóng, Goān goá ê chú goá ê ông kóng i. ¹⁹Ông kóng, Chiah-ê kiám-m̄-sī Iok-ap kap lí thong-thò-ê mah? Hū-jîn-lâng kóng, goá ê chú goá ê ông ah, goá kí lí ê oah-miā lâi chiū-choā, goá ê chú goá ê ông só· kóng--ê, bô lâng oē phian-chó á phian-iū lâi siám-pī i. In-ūi lí ê lô·-pòk Iok-ap hoan-hù goá, ēng chiah ê oē lóng ká lí ê lú-pī kóng. ²⁰Lí ê lô·-pòk Iok-ap choē án-ni, sī beh hō· chit ê sū-sè choán-oan; goá ê chú ū tì-hui, chhin-chhiūⁿ Siōng-tè sū-chiá ê tì-hui, oē thau-thiat sè-chiūⁿ it-chhè ê sū. ²¹Ông ká Iok-ap kóng, Goá tek-khak kiáⁿ chit ê sū; taⁿ lí tiōh khi, chhoā hit ê siâu-liân lâng Ap-sa-liông tò--lâi. ²²Iok-ap phak tī toē--nih lâi pài, chiok-siā ông; Iok-ap kóng, goá ê chú goá ê ông ah, ông kì-jian kiáⁿ lí ê lô·-pòk só· kiū--ê, kin-á-jit lí ê lô·-pòk chai goá ū tit-tiōh un-tián tī lí ê bák-chiu-chēng. ²³Tui án-ni Iok-ap khí-sin khi Kì-sút, chhoā Ap-sa-liông kàu Iâ-lō·-sat-léng. ²⁴Ông kóng, Kah i tò-khì i ê chhù, m̄-thang kìⁿ goá ê bīn. Ap-sa-liông chiū tò-khì i ê chhù, bô kìⁿ ông ê bīn.

²⁵Ap-sa-liông siⁿ-choē chin hó-khoàⁿ, thong Í-sek-liát tiong bô lâng chhin-chhiūⁿ i tit-tiōh lâng o-ló; tui kha-chiah-toé kàu thâu-khak-téng lóng bô hā-chhū. ²⁶I chián thâu-m̄ng ê sí, chhin i ê thâu-m̄ng, chiàu ông ê chhin, tâng nng-pah sià-khek-lèk; i chián-hoat sī tī

ták ê nî-bé, in-ūi i ê thâu-m̄ng chin-tāng, só-í tióh chián i. ²⁷Ap-sa-liông siⁿ saⁿ ê kiáⁿ, chít ê cha-bó·-kiáⁿ; cha-bó·-kiáⁿ miâ kiò Tha-má, sī chít-ê bīn-māu chin-súi ê cha-bó·-gín-ná.

²⁸Ap-sa-liông toà tī Iá-lō·sat-léng moá n̄ng-nî, bô kìⁿ ông ê bīn. ²⁹Ap-sa-liông chhe lāng kiò Iok-ap, beh chhe i khi kìⁿ ông. Chóng-sī Iok-ap m̄-khéng lâi i hia; i tē-jī pái chhe lāng khi kiò i, i iū-goân m̄-lâi. ³⁰Só-í Ap-sa-liông tui i ê lô·pók kóng, Lín khoàⁿ, Iok-ap ê h̄ng kũn goá ê h̄ng, i ū toā-bēh tī hia; lín khi pàng-hé sio i. Ap-sa-liông ê lô·pók chiū khi pàng-hé sio i. ³¹Iok-ap chiū khi-lâi kàu Ap-sa-liông ê chhù, m̄ng i kóng, Lí ê lô·pók siáⁿ-sū pàng-hé sio goá ê h̄ng? ³²Ap-sa-liông in Iok-ap kóng, Goá chhe lāng ká lí kóng, Lâi chia, hō· goá thang chhe lí khi kìⁿ ông, ká i kóng, Goá siáⁿ-sū tui Ki-sút tò-lâi ah? goá m̄-tát-tióh iū-goân toà hia; taⁿ tióh chún goá kìⁿ ông ê bīn, goá nā ū choē, i thang thâi goá. ³³Iok-ap chiū khi kìⁿ ông ká i kóng. I kiò Ap-sa-liông; Ap-sa-liông chiū lâi kìⁿ ông, tī ông ê bīn-chēng phak tī toē--nih. Ông chiū chim Ap-sa-liông.

15 Chit-tiáp liáu-āu Ap-sa-liông ūi ka-kī pī-pān chhia-bé, koh gō·cháp lāng cháu tī i ê thâu-chēng. ²Ap-sa-liông chá-chá khi-lâi, khiā tī siáⁿ-m̄ng ê lô·piⁿ; nā ū lāng lâi, ū àn-kiāⁿ tióh hō· ông phoàⁿ-toàn ê, Ap-sa-liông chiū kiò i lâi, m̄ng i kóng, Lí sī toh-lôh chít ê siáⁿ ê lāng? I in kóng, Lô·pók sī Í-sek-liát chít ê chi-phài ê lāng. ³Ap-sa-liông ká i kóng, Lí ê tãi-chì sī hó, sī ū chēng-lí; chóng-sī ông bô kau-tài lāng thiaⁿ lí ê oē. ⁴Ap-sa-liông koh kóng, Khó-sioh bô siat-lip goá choē chít ê toē-hng ê sím-phoàⁿ-si; kìⁿ-ū saⁿ-kò tióh phoàⁿ-toàn ê sū ê, lâi kàu goá chia, goá beh chiàu kong-gī phoàⁿ-koat i. ⁵Kìⁿ-ū lāng kũn-oá lâi

pài i, i chiū chhun-chhiú khan i, ká i chim. ⁶Í-sek-liát lāng ê tiong-kan, kìⁿ-nā beh khi kìⁿ ông kiū phoàⁿ-toàn ê, Ap-sa-liông lóng án-ni khoán-thāi in. Án-ni Ap-sa-liông àm-chīⁿ tit-tióh Í-sek-liát lāng ê sim.

⁷Kè sì-nî, Ap-sa-liông tui ông kóng, Kiū lí chún goá khi Hi-pek-lūn, hēng goá tui Iá-hô-hoa só· hē ê goān. ⁸In-ūi lô·pók tiàm tī A-lân ê Ki-sút bat hē goān kóng, Iá-hô-hoa nā kó-jiân hō· goá koh tò-lâi Iá-lō·sat-léng, goá beh hók-sāi Iá-hô-hoa. ⁹Ông ká i kóng, Lí thang pēng-an khi. Ap-sa-liông chiū khi-lâi, khi Hi-pek-lūn. ¹⁰Ap-sa-liông chhe cheng-thām kiāⁿ piàn Í-sek-liát ták chi-phài, kóng, Lín chít-ē thiaⁿ-kìⁿ sàu-kak ê siaⁿ, chiū kóng, Ap-sa-liông tī Hi-pek-lūn choē-ông lah. ¹¹Ap-sa-liông só· chhiáⁿ hí n̄ng-pah lāng kap i tui Iá-lō·sat-léng khi; hiah ê lāng lóng sī bû-ì tiong khi, m̄-chai hit ê sū. ¹²Tāi-pit ê bô-sū A-hi-to-hut sī Ki-lô lāng, tng hiàn-chè ê sī, Ap-sa-liông chhe lāng tiâu i, tui i ê pún-siāⁿ Ki-lô lâi; tui án-ni poān-gék ê sè-bīn ná không; in-ūi tē Ap-sa-liông ê peh-siⁿ jít-jít ná-choē.

¹³Ū lāng lâi pò Tāi-pit kóng, Í-sek-liát lāng ê sim lóng kui-ñg Ap-sa-liông lah. ¹⁴Tāi-pit ká hiah ê kap i tī Iá-lō·sat-léng ê jîn-sin kóng, Khi-lâi, lán tióh tô-cháu; nā bô, lóng boē-oē siám-pī Ap-sa-liông; tióh kín-kín khi, kiaⁿ-liáu i kín-kín kàu lâi jip-tióh lán, hām-hāi lán, ēng to thâi-sí siáⁿ-lâi ê lāng. ¹⁵Ông ê jîn-sin ká ông kóng, Khoàⁿ ah, goá ê chú goá ê ông só· chú-ì ê, lí ê lô·pók lóng beh kiāⁿ. ¹⁶Ông chhut-khi, i ê ke-koàn lóng tē i; ông lâu chap ê pìn-hui kò· chhù. ¹⁷Ông chhut-khi, chēng peh-siⁿ lóng tē i; kàu Pek-bék-hap chiū hioh. ¹⁸Ông ê jîn-sin lóng tī i ê bīn-chēng kiāⁿ-kè-khi, it-chhè ê Ki-lī-thê lāng, Pí-lī-thê lāng, kap Ka-ték lāng, chiū-sī tui Ka-ték tē i lâi ê

lák-pah lāng, iā lóng tī ông ê bīn-chêng kiāⁿ-kè--khì.

¹⁹Ông kā Ka-ték lāng Í-thài kóng, Lí siáⁿ-sū kap goán khi? thang tò-khì kap ông saⁿ-kap toà; lí sī goá-pang lāng, chhian-soá tī goā-bīn, thang tò-khì pún só·chāi. ²⁰Lí chā-jit chiaⁿ lāi, goá kin-á-jit kiám thang lô-hoan lí kap goán phiau-liū ah? goá khi goá só· khi ê só·chāi; lí thang tò-khì, toà lí ê hiaⁿ-tī saⁿ-kap tò-khì; goān un-tián sêng-sit kap lí tī-teh. ²¹Í-thài in ông kóng, Goá kí éng-oáh ê Iā-hô-hoa, kap goá ê chú goá ê ông ê oáh-miā, lāi chiū-choā, goá ê chú goá ê ông hék-oáh hék-sí, kīⁿ só· tī-teh ê só·chāi, lí ê lô·pók iā tī-hia. ²²Tāi-pit kā Í-thài kóng, Lí khi, kè--khì. Ka-ték lāng Í-thài kap hiah ê tē i ê lāng, kap só· ū ê gín-ná chiū lóng kè--khì. ²³Piàn-toē toā-siaⁿ thī-khau; chêng peh-siⁿ lóng kè--khì, ông iā kè Khip-lūn khoe; chêng peh-siⁿ kè--khì, òng không-iá teh-kiāⁿ.

²⁴Sat-tok kap lóng-chóng tē i ê Lī-bī lāng kng Siōng-tē ê iok-kūi lāi; in hē Siōng-tē ê kūi tī-hia. A-pí-a-tha chiūⁿ--lāi, thêng-hāu chêng peh-siⁿ tui siāⁿ-lāi chhut-lāi, lóng kè--khì. ²⁵Ông kā Sat-tok kóng, Lí kng Siōng-tē ê kūi tò-khì siāⁿ-lāi; goá nā tit-tiōh un-tián tī Iā-hô-hoa ê bák-chêng, I beh hō· goá tò-lāi, hō· goá koh khoàⁿ-kīⁿ i, kap I khiā-khí ê só·chāi. ²⁶Siat-sú I kóng, Goá bô hoaⁿ-hí lí; khoàⁿ ah, goá tī chia, goān I chiāu I khoàⁿ-choē hó·ê kiāⁿ tī goá. ²⁷Ông koh kā chè-si Sat-tok kóng, Lí kiám m̄-sī sian-kiàn mah? Lí thang an-jian tò-khì siāⁿ-lāi; lí ê kiáⁿ A-hi-má-su, kap A-pí-a-tha ê kiáⁿ Iok-ná-tan, lín chit n̄ng ê kiáⁿ lóng thang kap lí khi. ²⁸Khoàⁿ ah, goá tī không-iá ê tō·kháu thêng-hāu tui lí hia ū siau-sit lāi, pò goá chai sit-chêng. ²⁹Tui án-ni Sat-tok kap A-pí-a-tha kng Siōng-tē ê

kūi tò-khì Iā-lō·sat-léng; in chiū toà tī-hia.

³⁰Tāi-pit tui chiūⁿ Kaⁿ-ná soaⁿ ê lō· chiūⁿ-khi, ná chiūⁿ-khi ná-háu; tà thâu-khak thêng chiaⁿ-kha lāi kiāⁿ; tē i khi ê chêng peh-siⁿ iā tà thâu-khak chiūⁿ--khi, ná chiūⁿ-khi ná-háu. ³¹Ū lāng pò Tāi-pit kóng, A-hi-to-hut iā tē Ap-sa-liōng tī poān-tóng ê tiong-kan. Tāi-pit kóng, Iā-hô-hoa ah, kiū Lí hō· A-hi-to-hut ê kē-bō· pīⁿ-choē gōng. ³²Tāi-pit chiūⁿ kàu soaⁿ-téng, keng-pài Siōng-tē ê só·chāi, khoàⁿ-kīⁿ A-ki lāng Hō·su, saⁿ thiah-līh, thâu-khak sám tín-ai, lāi ngiā-chih i. ³³Tāi-pit kā i kóng, Lí nā kap goá khi, oē thoa-thui goá; ³⁴lí nā tò-khì, siāⁿ-lāi, kā Ap-sa-liōng kóng, Ông ah, goá beh choē lí ê lô·pók; goá chêng choē lí ê pē ê lô·pók, taⁿ goá iā beh án-ni choē lí ê lô·pók, lí chiū thang kā goá phò-hoai A-hi-to-hut ê kē-bō·. ³⁵Chè-si Sat-tok kap A-pí-a-tha kiám bô kap lí tī-hia mah? Lí tui ông-kiong-lāi só· thiaⁿ-kīⁿ-ê, chiū tiōh kā chè-si Sat-tok kap A-pí-a-tha kóng. ³⁶Sat-tok ê kiáⁿ A-hi-má-su, A-pí-a-tha ê kiáⁿ Iok-ná-tan, chí n̄ng ê kiáⁿ iā kap in tī-hia; kīⁿ-nā lín só· thiaⁿ-kīⁿ ê, thang thok-tiōng in lāi pò goá. ³⁷Tui án-ni, Tāi-pit ê pēng-iú Hō·su jlp siāⁿ. Ap-sa-liōng iā jlp Iā-lō·sat-léng.

16 Tāi-pit kē soaⁿ-téng bô joā-hng, khoàⁿ-kīⁿ Bí-hui-pho-siat ê lô·pók, Sé-pa lāi tú-tiōh i, toà koà-oaⁿ ê lū n̄ng-chiah, chàl piáⁿ n̄ng-pah, phū-tô-koaⁿ, chit-pah pha, hē-thiⁿ ê ké-chí chit pah, chiú chit phê-lōng. ²Ông m̄ng Sé-pa kóng, Lí toà chiaⁿ-ê lāi sī sím-mih ì-sù? Sé-pa kóng, Lū sī beh hō· ông ê ke-koan khiā, piáⁿ kap hē-thiⁿ ê ké-chí, sī beh hō· siāu-liān lāng chiaⁿ; chiú sī beh hō· tī không-iá iā-siān ê lāng lim. ³Ông m̄ng kóng, Lí ê chú-lāng ê kiáⁿ tī toh-lóh? Sé-pa in ông kóng, I iū goān tī Iā-lō·sat-léng; in-ūi i kóng, Í-sek-liát

lâng kin-á-jít beh chiong goá ê pē ê kok hêng goá. ⁴Ông kā Sé-pa kóng, Bí-hui-pho-siat só· ũ-ê lóng kui hō· lí. Sé-pa kóng, Goá kūi-pài; goān tit-tiòh un-tián tī goá ê chú goá ê ông ê bīn-chêng.

⁵Tāi-pit ông kàu Pa-hō·līm ê sī, khoàⁿ ah, ũ Sò-lô chòk ê ke chit-lâng chhut-lâi, chiū-sī Ki-láh ê kiáⁿ, miâ kiò Sī-múi; i chhut-lâi, ná-kiáⁿ ná chiū-chó[·]; ⁶koh khiòh chiòh-thâu tìm Tāi-pit kap Tāi-pit ông ê jīn-sīn; hit-sī chêng peh-siⁿ kap ióng-sū lóng tī ông ê chó-iū. ⁷Sī-múi chiū-chó[·] kóng, Lí chit ê lâu lêng ê huìh ê lêng ah, lí chit ê pháiⁿ-lêng ah, khi--ah, khi--ah. ⁸Lí thoè Sò-lô choè ông, taⁿ Iâ-hô-hoa ēng i ê ke ê huìh lóng kui tī lí; Iâ-hô-hoa ēng chit ê kok kau tī lí ê kiáⁿ Ap-sa-liông ê chhiú; taⁿ lí tú-tiòh ok-pò, in-ūi lí sī lâu lêng ê huìh ê lêng. ⁹Sé-ló-ngá ê kiáⁿ A-pí-su kā ông kóng, Chit chia^h sí-káu, kiám thang chiū-chó[·] goá ê chú goá ê ông mah? kiū lí chún goá kè-khi, koah i ê thâu. ¹⁰Ông kóng, Sé-ló-ngá chia^h ê kiáⁿ ah, goá kap lín ũ sím-mih kan-siáp? chhut-chāi i chiū-chó[·], in-ūi Iâ-hô-hoa hoan-hù i kóng, Lí tiòh chiū-chó[·] Tāi-pit; án-ni chī-chūi káⁿ kóng, Lí siáⁿ-sū án-ni kiáⁿ ah? ¹¹Tāi-pit koh kā A-pí-su, kap i ê chêng jīn-sīn kóng, Goá chhin-siⁿ ê kiáⁿ siōng-chhiáⁿ siàu-siūⁿ goá ê siⁿ-miā, hô-hòng chit ê Piān-ngá-bín lêng ah? iōng-ún i, chhut-chāi i chiū-chó[·]; in-ūi che sī Iâ-hô-hoa kah i ê. ¹²Kiám-chhái Iâ-hô-hoa kàm-chhat goá ê oan-óng, in-ūi i kin-á-jít ê chiū-chó[·], Iâ-hô-hoa beh ēng hó pò goá. ¹³Tāi-pit kap tē i ê lêng kiáⁿ lō· khi. sī-múi kiáⁿ tī i saⁿ-tùi ê soaⁿ-phiāⁿ, ná-kiáⁿ ná chiū-chó[·], koh tìm chiòh-thâu, iā thô. ¹⁴Ông kap tē i ê chêng peh-siⁿ chin iā-siān, kàu chit só·chāi, chiū tī-hia hiòh-khùn.

¹⁵Ap-sa-liông kap chêng peh-siⁿ Í-sek-liát

lêng, lâi kàu Iâ-lō·sat-léng. A-hi-to-hut iā kap i tī-hia. ¹⁶Tāi-pit ê pêng-iú, A-ki-lêng Hō·su, lâi kàu Ap-sa-liông hia; Hō·su kā Ap-sa-liông kóng, Goān ông bān-soè, goān ông bān-soè. ¹⁷Ap-sa-liông kā Hō·su kóng, Lí hó khoán-thāi lí ê pêng-iú sī án-ni mah? siáⁿ-sū bô kap lí ê pêng-iú saⁿ-kap khi ah? Hō·su kā Ap-sa-liông kóng, M-sī án-ni, Iâ-hô-hoa kap chit ê peh-siⁿ, kap Í-sek-liát chêng-lêng, só· kéng ê, goá beh kui i, iā beh kap i toà. ¹⁹Koh chit-hāng, goá tiòh hók-sāi chī-chūi ah? kiám-m-sī tī i ê kiáⁿ ê bīn-chêng mah? Goá cháiⁿ-iūⁿ tī lí ê lâu-pē ê bīn-chêng hók-sāi, iā beh án-ni tī lí ê bīn-chêng. ²⁰Ap-sa-liông kā A-hi-to-hut kóng, Lín tiòh kè-ék, khoàⁿ lán tiòh cháiⁿ-iūⁿ kiáⁿ. ²¹A-hi-to-hut kā Ap-sa-liông kóng, Lí ê lâu-pē só· lâu-teh kò-chhù hiah ê pìn-hui, lí tiòh kap i khùn; chiū Í-sek-liát ê chêng-lêng thiaⁿ-kìⁿ lí hō· lí ê lâu-pē iām-òⁿ, kìⁿ-nā kui lí ê lêng, i ê chhiú beh giám-ngī. ²²In chiū kā Ap-sa-liông tah pò·pīⁿ, tī ông-kiong ê chng-pīⁿ-téng. Ap-sa-liông chiū tī Í-sek-liát chêng-lêng ê bīn-chêng jip--khi, kap i ê lâu-pē ê pìn-hui khùn. ²³Hit-sī A-hi-to-hut só· kè-ék ê kè-ék, chhin-chhiūⁿ lêng mng Siōng-tè ê oē chit-iūⁿ; A-hi-to-hut tui-tī Tāi-pit á-sī tui-tī Ap-sa-liông só· kè-ék ê, lóng sī án-ni.

17 A-hi-to-hut koh kā Ap-sa-liông kóng, chhiáⁿ lí chún goá kéng chit-bān nng-chheng lêng, kim-mi goá beh khi-sin tui-jip Tāi-pit; ²thàn i iā-siān chhiú nng, goá beh jip-tiòh i, hō· i kiaⁿ-hiāⁿ, tē i ê chêng peh-siⁿ beh lóng tô-cháu; goá chiū kan-ta thāi-sí ông nā-tiāⁿ; ³hō· chêng peh-siⁿ lóng kui lí; lí só· chhē hit-lêng sī chhin-chhiūⁿ chêng-lêng tò-tng--lâi chit-iūⁿ; án-ni peh-siⁿ lóng pêng-an. ⁴Ap-sa-liông kap Í-sek-liát ê tióng-ló lóng liáh chit ê

oē choè hó.

⁵Ap-sa-liông kóng, Tiòh kiò A-ki lāng Hō-su lāi, lán iā thang thiaⁿ i só· kóng ê. ⁶Hō-su kàu Ap-sa-liông hia, Ap-sa-liông kā i kóng, A-hi-to-hut kóng án-ni, lán tiòh chiàu i ê oē kiâⁿ mah? Nā bô, lí chiū tiòh kóng. ⁷Hō-su kā Ap-sa-liông kóng, A-hi-to-hut chit-pái só· kè-ék--ê m̄-hó. ⁸Hō-su koh kóng, Lí chai lí ê lāu-pē, kap tè i ê lāng, lóng sī íóng-sū; taⁿ in ê sim bêng-liát, chhin-chhiūⁿ chhân-iá sit-lòh kiáⁿ ê hím-bú chit-poaⁿ. Koh lí ê lāu-pē sī chiàn-sū, tek-khak bô kap peh-siⁿ saⁿ-kap hioh. ⁹Khoàⁿ ah, i taⁿ bih tī soaⁿ-khiⁿ á-sī pát só·-chāi; nā ū kúi-nā lāng tãi-seng hō· i thâi-sí, kìⁿ-nā thiaⁿ-kìⁿ ê lāng beh kóng, Tè Ap-sa-liông ê peh-siⁿ kī-tiong ū siū-thâi. ¹⁰Sui-jian ū lāng hó-táⁿ, in ê sim chhin-chhiūⁿ sai ê sim, iā beh lóng siau-iūⁿ; in-ūi Í-sek-liát lāng lóng chai lí ê pē sī íóng-sū, tè i ê lāng iā lóng sī hó-táⁿ. ¹¹Só·-í goá kú-gī, tiòh hō· Í-sek-liát cheng-lāng, tui Tàn kàu Piát-sī-pa, chū-chlp lāi lí chia, chhin-chhiūⁿ hái-piⁿ ê soa hiah-choē, lí iā chhin-sin tok-tin. ¹²Án-ni, bô-lūn tī sím-mih só·-chāi tú-tiòh i, lán beh kong-kek i, lòh tī i ê téng-bīn chhin-chhiūⁿ lō·-chúi lòh tī toē--nih chit-poaⁿ, hō· i kap tè ê lāng bô lāu chit-ê. ¹³I nā jip siâⁿ, Í-sek-liát cheng-lāng beh toà soh kàu hit ê siâⁿ, lán beh kā i thoa lòh hô, tì-kàu tī-hia bô khoàⁿ-kìⁿ chit tè chiòh-thâu-á. ¹⁴Ap-sa-liông kap Í-sek-liát cheng-lāng kóng, A-ki lāng, Hō-su ê kè-ék, pí A-hi-to-hut ê kè-ék khah-hó; in-ūi Iâ-hô-hoa tiâⁿ-tiòh beh phò-hoai A-hi-to-hut ê hó kè-ék, tì-kàu Iâ-hô-hoa thang kàng chai-ē hō· Ap-sa-liông.

¹⁵Hō-su kā chè-si Sat-tok kap A-pí-a-tha kóng, A-hi-to-hut kā Ap-sa-liông kap Í-sek-liát ê tiúⁿ-ló só· kè-ék-ê sī án-ni, án-ni, goá

só· kā i kè-ék ê sī án-ni, án-ni. ¹⁶Taⁿ lín tiòh koáⁿ-kín chhe lāng khi, kā Tāi-pit kóng, kim-mi m̄-thang tiàm tī khòng-iá ê tō·-kháu, tek-khak tiòh kè-hô, bián-tit ông kap tè i ê lāng lóng siū thun-biát. ¹⁷Hit-si Lok-ná-tan kap A-hi-má-su tiàm tī Ūn-lô-kiat teh theng-hāu, in-ūi m̄-káⁿ hō· lāng khoàⁿ-kìⁿ in jip siâⁿ. Ū chit ê lú-pī lāi kā in kóng, in chiū khi kā Tāi-pit ông kóng. ¹⁸Chóng-sī ū chit ê gín-ná khoàⁿ-kìⁿ in, chiū khi kā Ap-sa-liông kóng; in nng-lāng koáⁿ-kín cháu kàu Pa-hō·līm, bó·-lāng ê chhù; hit-lāng ê īⁿ-lāi ū chíⁿ, in nng lāng chiū lòh--khi hia; hit-ke ê hū-jin-lāng ēng koà khàm chíⁿ-chhùi, téng-bīn pho· bēh-sut, tãi-chi chiū bô lāu-siat. ²⁰Ap-sa-liông ê lô·-pòk lāi kàu hū-jin-lāng hit keng chhù, mng i kóng, A-hi-má-su kap Lok-ná-tan tī toh-lòh? Hū-jin-lāng kóng, In kè-khoe khi lah. Lô·-pòk chhē in, chhē-bô-tiòh, chiū tò-khi Iâ-lō·-sat-léng. ²¹In tò-khi liáu, nng-lāng tui chíⁿ--nih khi-lāi, khi kā Tāi-pit ông kóng; in kā Tāi-pit kóng, Lín tiòh khi-lāi, kín-kín kè-chúi, in-ūi A-hi-to-hut ū án-ni, án-ni kè-ék, beh hāi lí. ²²Tāi-pit kap tè i ê lāng chiū khi-lāi, kè Lok-tàn; kàu thiⁿ-kng, bô chhun chit-lāng bô kè Lok-tàn. ²³A-hi-to-hut khoàⁿ-kìⁿ bô chiàu i ê kè-ék kiâⁿ, chiū pī-pān lū khi-sin, tò-khi i ê siâⁿ, kàu i ê ke, hoan-hù i ê ke-sū, chiū ka-kī tiâu--sí, bài-chòng tī i ê lāu-pē ê bōng.

²⁴Tāi-pit kàu Má-hap-liām. Ap-sa-liông, kap tè i ê Í-sek-liát lāng, iā lóng kè Lok-tàn. ²⁵Ap-sa-liông siat-lp A-má-sat choè kun-tiúⁿ thoè Lok-ap. A-má-sat sī Í-sek-liát lāng, Í-ték-lāh ê kiáⁿ; Í-ték-lāh bat kap Ná-hat ê cha-bó·-kiáⁿ A-pí-kai tâng-pāng. Chit ê A-pí-kai kap Lok-ap ê lāu-bú Sé-ló·-ngá sī chí-bē. ²⁶Í-sek-liát lāng kap Ap-sa-liông chat-iâⁿ tī Kì-liát toē.

²⁷Tāi-pit kàu Má-hap-liām hit-sî, A-bûn chók ê Láh-pa lāng Ná-hat ê kiáⁿ Sok-pí, Lô-tí-pa lāng A-bí-lī ê kiáⁿ Má-kiat, Kì-liát ê Lô-kì-lim lāng Pa-se-lai, toà pho·á, phûn, hui-khì, sió-bêh toā-bêh mī-hún, chhá ê gō·kak, tâu·á, âng-tâu, chhá-tâu, bit, lin-iû, iûⁿ, gū-lin-piáⁿ, kiong-kip Tāi-pit kap tē i ê lāng thang chiáh; in-ūi in kóng, Peh-sìⁿ tī không-iá pit-tiāⁿ oē iau, ià-siān, chhui-ta.

18 Tāi-pit sng tē i ê peh-sìⁿ, siat-lip chhian-chóng peh-chóng choā in. ²Tāi-pit chhe peh-sìⁿ chhut-khì, saⁿ-hūn-chit kau Iok-ap ê chhiú, saⁿ-hūn-chit kau Sé-ló·ngá ê kiáⁿ Iok-ap ê hiaⁿ-tī A-pí-su ê chhiú, saⁿ-hūn-chit kau Ka-ték lāng Í-thài ê chhiú. Ông ká peh-sìⁿ kóng, Goá tek-khak kap lín chhut-khì. ³Chóng-sī peh-sìⁿ kóng, Lí m̄-thang chhut-khì; nā goán tô-cháu, tui-ték bô liáh goán choè iàu-kín; goán nā tīn-bông chit-poàⁿ, tui-ték iā bô liáh goán choè iàu-kín, in-ūi lí chit-lāng tòng-tit goán chit-bān lāng; lí tui siāⁿ-lāi pang-chān goán khah-hó. ⁴Ông ká in kóng, Lín só· khoàⁿ-choè hó-ê, goá beh kiāⁿ i; tui án-ni ông khiā tī siāⁿ-m̄ng-piⁿ, peh-sìⁿ ū-ê chit-pah, ū-ê chit-chheng, chiàu chhù-sū chhut-khì. ⁵Ông bēng-lēng Iok-ap, A-pí-su, Í-thài, kóng, Lín toà-tiòh goá, khoán-thāi hit ê siàu-liân lāng Ap-sa-liông tiòh khah-khoan. Ông ūi-tiòh Ap-sa-liông bēng-lēng hiah ê siú-léng ê oē, peh-sìⁿ lóng ū thiaⁿ-kìⁿ. ⁶Peh-sìⁿ chiū chhut-khì chhân-iá tí-ték Í-sek-liát lāng, tī Í-hoat-liân ê chhiū-nâ kau-chiàn. ⁷Tī-hia Í-sek-liát lāng thāi-su tī Tāi-pit hiah ê lô·pók ê bīn-chēng; hit-jit tīn-bông-ê chin-choē, kiōng ū n̄ng-bān lāng. ⁸In-ūi chiàn-tīn-soàⁿ chin khui, piàn-piàn tī hit só·chāi; chhiū-nâ só· thun-biát-ê, pí hō· to só· thun-biát-ê khah-choē. ⁹Ap-sa-liông ngó·jiàn tú-tiòh

Tāi-pit ê lô·pók. Ap-sa-liông khiā i ê lô, lô cháu tui toā-chāng siōng-chhiū ām ê chhiū-ki-ē keng-kè, i ê thau-khak kù--tiòh siōng-chhiū, tiâu tī poàⁿ-khong-tiong; só· khiā ê lô choè i khi. ¹⁰Ū chit-ê lāng khoàⁿ-kìⁿ, chiū ká Iok-ap kóng, Goá khoàⁿ-kìⁿ Ap-sa-liông kù tī siōng-chhiū--nih. ¹¹Iok-ap ká pò i ê lāng kóng, Lí í-keng khoàⁿ-kìⁿ, siáⁿ-sū m̄ tui-hia phah i, hō· i tui-lòh toē ah? Goá chiū siúⁿ lí chấp ê gūn, kap chit tiâu toà. ¹²Hit ê lāng ká Iok-ap kóng, Goá chiū tit-tiòh chit-chheng gūn tī goá ê chhiú, iā m̄-káⁿ chhun-chhiú hāi ông ê kiáⁿ; in-ūi goán thiaⁿ-kìⁿ ông bēng-lēng lí kap A-pí-su Í-thài kóng, Lín tiòh soè-jī m̄-thang hāi hit ê siàu-liân lāng Ap-sa-liông. ¹³Goá nā lām-sám choè lai hāi i ê siⁿ-miā, bô chit-hāng oē môa-tit ông, lí chiū beh khiā tī piⁿ-á m̄-chhap goá. ¹⁴Iok-ap kóng, Goá m̄-thang kap lí iān-chhiān. Iok-ap chhiú kiáh saⁿ ki té-chhiuⁿ, hit-sî Ap-sa-liông tiâu tī siōng-chhiū, iáu oáh--teh, chiū chhak-thau i ê sim. ¹⁵Ká Iok-ap kiáh ke-si ê siàu-liân lāng chấp-ê, ūi Ap-sa-liông phah hō· i sí.

¹⁶Iok-ap pūn sàu-kak, peh-sìⁿ chiū tò-lai, bô koh jip Í-sek-liát lāng; in-ūi Iok-ap chók-chí peh-sìⁿ. ¹⁷In chiong Ap-sa-liông hiat tī chhiū-nâ-lai chit ê toā chhim-khiⁿ, téng-bīn thiáp chit toā tui ê chiòh-thau; Í-sek-liát chēng-lāng ták-ê cháu tò-khi in ê pò·pīⁿ. ¹⁸Ap-sa-liông oáh-teh ê sī, tī Ông ê soaⁿ-kok ūi ka-kī khiā chit ki thiāu; in-ūi i kóng, Goá bô kiáⁿ thang lâu goá ê miā; chiū ēng ka-kī ê miā chheng hit ki thiāu; kàu kin-á-jit chheng choè Ap-sa-liông ê hō-piáu.

¹⁹Sat-tok ê kiáⁿ A-hi-má-su kóng, Chún goá cháu--khì, pò siau-sit hō· ông, chiū-sī Iā-hô-hoa ū cháiⁿ-iūⁿ tui i ê tui-ték pò-siū. ²⁰Iok-ap ká i kóng, Lí kin-á-jit m̄-thang khi pò siau-

sit, pát-jít lí thang pò siau-sit; chóng-sī kin-á-jít lí m̄-thang pò siau-sit, in-ūi ông ê kiáⁿ í-keng sí. ²¹Iok-ap ká Kó[·]-sī lāng kóng, Lí khi chiong lí só[·] khoàⁿ-kìⁿ-ê ká ông kóng. Kó[·]-sī lāng tui Iok-ap kiok-kiong chiū cháu--khi. ²²Sat-tok ê kiáⁿ A-hi-má-su koh ká Iok-ap kóng, Bô-lūn cháiⁿ-iūⁿ, kiū lí chún goá tē Kó[·]-sī lāng cháu-khi. Iok-ap kóng, Goá ê kiáⁿ, lí pò siau-sit, kì-jian boē tit-tiōh siúⁿ, siáⁿ-sū ài cháu--khi ah? ²³I koh kóng, Bô-lūn cháiⁿ-iūⁿ, goá beh cháu--khi. Iok-ap kóng, Lí cháu--khi. A-hi-má-su chiū tui Píⁿ-iūⁿ ê lō[·] cháu--khi; cháu choē Kó[·]-sī lāng ê thâu-chêng.

²⁴Tāi-pit tú-á chē tī m̄ng ê siáⁿ-chhiūⁿ ê tiong-kan; siú-bāng ê lāng peh-chiūⁿ siáⁿ-chhiūⁿ kàu siáⁿ-m̄ng ê lâu-téng, kiáh-bák koan-khoàⁿ, khoàⁿ-kìⁿ chít-lāng toaⁿ-sin cháu--lái. ²⁵Siú-bāng-ê kiò, lái ká ông kóng. Ông kóng, I nā ka-kī lái, tek-khak ū siau-sit beh pò. I ná-cháu ná-kūn-oá lái. ²⁶Siú-bāng ê lāng koh khoàⁿ-kìⁿ chít-lāng cháu--lái, siú-bāng-ê ká kò[·] siáⁿ-m̄ng ê lāng kóng, Khoàⁿ ah, ū chít-lāng toaⁿ-sin cháu--lái. Ông kóng, Che iā-sī pò siau-sit ê. ²⁷Siú-bāng-ê kóng, Goá khoàⁿ-kìⁿ thâu-chêng teh-cháu-ê chhin-chhiūⁿ Sat-tok ê kiáⁿ A-hi-má-su teh-cháu ê khoán. Ông kóng, I sī hó lāng, lái pò hó siau-sit.

²⁸A-hi-má-su tui ông kiò kóng, Pêng-an lah; chiū tī ông ê bīn-chêng phak tī toē-nih pài, kóng, Iā-hô-hoa lí ê Siōng-tē sī eng-kai tiōh o-ló ê; in-ūi I í-keng chiong hiah ê khí-chhiūⁿ kong-kek goá ê chú goá ê ông ê lāng kau hō[·] lí. ²⁹Ông kóng, Siāu-liān lāng Ap-sa-liōng pêng-an á-bô? A-hi-má-su in kóng, Iok-ap chhe ông ê lô[·]-pók, kap lí ê lô[·]-pók, hit-sī goá khoàⁿ-kìⁿ toā hán-hoā, m̄-chai sī sīm-mih tãi-chì. ³⁰Ông kóng, Lí kiāⁿ-khui, khiā

tī píⁿ-á. I chiū kiāⁿ-khui, khiā-teh. ³¹Kó[·]-sī lāng iā kau; Kó[·]-sī lāng kóng, Ū siau-sit pò hō[·] goá ê chú goá ê ông; Iā-hô-hoa kin-á-jít tui it-chhè heng-khí kong-kek lí ê lāng ká lí pò-siū. ³²Ông ká Kó[·]-sī lāng kóng, Siāu-liān lāng Ap-sa-liōng pêng-an bô? Kó[·]-sī lāng in kóng, Goān goá ê chú goá ê ông ê tui-ték, kap it-chhè heng-khí kong-kek lí, beh hāi lí ê lāng, lóng chhin-chhiūⁿ hit ê siāu-liān lāng chít-iūⁿ. ³³Ông chiū put-chí siong-sim, chiūⁿ siáⁿ-m̄ng-téng ê lâu thi-khau, ná-kiāⁿ ná-kóng, Goá ê kiáⁿ Ap-sa-liōng ah, goá ê kiáⁿ, goá ê kiáⁿ, Ap-sa-liōng ah; goá hūn boē thoē lí sí, Ap-sa-liōng ah, goá ê kiáⁿ, goá ê kiáⁿ.

19 Ū lāng ká Iok-ap kóng, Khoàⁿ ah, ông ūi-tiōh Ap-sa-liōng thi-khau pí-ai. ²Hit-jít ê tek-sèng piàn-choē chêng peh-siⁿ ê pí-ai; in-ūi hit-jít peh-siⁿ thiaⁿ-kìⁿ kóng, Ông ūi-tiōh i ê kiáⁿ iu-būn. ³Hit-jít peh-siⁿ àm-chīⁿ jíp siáⁿ, chhin-chhiūⁿ tī tīn--nih tô-cháu kiàn-siāu ê peh-siⁿ àm-chīⁿ jíp-lái chít-iūⁿ. ⁴Ông tà i ê bīm, ông toā-siaⁿ háu, kóng, Goá ê kiáⁿ Ap-sa-liōng ah, Ap-sa-liōng, goá ê kiáⁿ, goá ê kiáⁿ ah. ⁵Iok-ap jíp chhū khi kìⁿ ông kóng, Lí kin-á-jít hō[·] lí it-chhè ê lô[·]-pók bô thé-biān; in kin-á-jít kiū lí ê siⁿ-miā, kap lí ê kiáⁿ cha-bók-kiáⁿ ê siⁿ-miā, lí hiah ê bó[·] ê siⁿ-miā, lí hiah ê soē-î ê siⁿ-miā; ⁶in-ūi oàn-hūn lí ê, lí thiāⁿ i, thiāⁿ lí ê, lí oàn-hūn i. Lí kin-á-jít í-keng hián-bēng lí bô iàu-kín hiah ê siú-léng kap jīn-sin; goá kin-á-jít khoàⁿ-chhut, nā Ap-sa-liōng oáh-teh, goán kin-á-jít lóng sí, lí chiū hoaⁿ-hí. ⁷Taⁿ lí tiōh khí-lái chhut-khi, an-ùi lí ê lô[·]-pók ê sim; goá kí Iā-hô-hoa lái chiū-choā, lí nā bô chhut-khi, kim-mi bô chít-lāng kap lí tī-teh; che chai-ē pí lí tui siāu-liān kàu taⁿ só[·] tú-tiōh-ê khah-chhám. ⁸Ông chiū khí-lái, chē tī siáⁿ-m̄ng--nih; ū lāng ká chêng peh-siⁿ kóng,

Khoàⁿ ah, ông chē tī siàⁿ-m̄ng--nih; peh-sìⁿ chiū lóng kàu ông ê bīn-chēng.

Í-sek-liát lāng í-keng tô-cháu, ták-lāng tò-khì i ê pò·-pīⁿ. ⁹Í-sek-liát cheng chi-phài ê lāng hun-hun gī-lūn, kóng, Ông bat kiù lán thoat-lī tui-ték ê chhiú, koh kiù lán thoat-lī Hui-lī-sū lāng ê chhiú; taⁿ i siám-pī Ap-sa-liông cháu tī goā-bīn. ¹⁰Lán ēng iū boah Ap-sa-liông tī-lí lán, i í-keng tīn-bōng. Lín taⁿ siáⁿ-sū m̄ chhut chit-kù, chhiáⁿ ông tò-lái ah?

¹¹Tāi-pit ông chhe lāng khi kīⁿ chè-si Sat-tok kap A-pí-a-tha, kóng, Lín tiòh kā Iū-tāi ê tióng-ló kóng, Í-sek-liát cheng-lāng í-keng ū oē kàu tī ông, chhiáⁿ ông tò-lái i ê chhiú; lín chhiáⁿ ông tò-lái, siáⁿ-sū choē lāng ê lô·bé ah? ¹²Lín sī goá ê hiaⁿ-tī, sī goá ê kut-jiók; chhiáⁿ ông tò-lái siáⁿ-sū choē lāng ê lô·bé ah? ¹³Iā kā A-má-sat kóng, Lí kiám m̄-sī goá ê kut-jiók mah? Goá nā bô siat-lip lí thoē Iok-ap tng-tng tī goá ê bīn-chēng choē kun-tiūⁿ, goān Siōng-tè ka-pē chek-hoát goá. ¹⁴Tui án-ni, i chiū kám-kek Iū-tāi cheng-lāng ê sim, chhin-chhiūⁿ chit-lāng ê sim; in chiū chhe lāng khi kīⁿ ông kóng, Goān lí kap lí ê cheng-jin-sin tò-lái. ¹⁵Ông chiū tò-lái, kàu Iok-tàn; Iū-tāi lāng lái kàu Kiat-kah, beh ngiā-chih ông, chhoā ông kè Iok-tàn.

¹⁶Pa-hō·līm ê Piān-ngá-bín lāng, Ki-láh ê kiáⁿ Sī-múi koáⁿ-kín kap Iū-tāi lāng lóh--lái ngiā-chih Tāi-pit ông. ¹⁷Kap i lái ê, ū chit-chheng ê Piān-ngá-bín lāng, iā ū Sò-lô ke ê lô·pók Sé-pa, kap i chap-gō· ê kiáⁿ, jī-chap ê lô·pók, in lóng tī ông ê bīn-chēng kè Iok-tàn. ¹⁸U tō·chūn kè--khi, chàl ông ê ke-koàn, chhut-chāi ông ēng. Ông kè Iok-tàn ê sī, Ki-láh ê kiáⁿ Sī-múi chiū phak tī ông ê bīn-chēng; ¹⁹kā ông kóng, Goá ê chú goá ê ông chhut Iā-

lō·sat-léng ê jít, lí ê lô·pók kiáⁿ poē-gék ê sū; taⁿ kiū goá ê chú bōh-tit chek-choē goá, bōh-tit kì-tit, ông iā bōh-tit hē tī sim--nih. ²⁰Lí ê lô·pók beng-beng chai ka-kī ū choē, só·í Iok-sek choān-ke kin-á-jít goá tē-ít tēi-seng lóh-lái ngiā-chih goá ê chú goá ê ông. ²¹Sé-ló·ngá ê kiáⁿ A-pí-su kóng, Sī-múi bat chiū-chó· Iā-hô-hoa só· boah-iū--ê, kiám m̄-tiòh in-tui án-ni hō· i sí mah? ²²Tāi-pit kóng, Sé-ló·ngá ê kiáⁿ ah, goá kap lín sīm-mih kan-siáp, hō· lín kin-á-jít hoán-tui goá ah? kin-á-jít Í-sek-liát tiong kiám thang hō· lāng sí mah? goá kiám m̄-chai goá kin-á-jít choē Í-sek-liát ông mah? ²³Tui án-ni ông kā Sī-múi kóng, Lí m̄-bián sí; ông chiū tui i chiū-choā.

²⁴Sò-lô ê sun, Bí-hui-pho-siat iā lóh-khi ngiā-chih ông; i tui ông khi ê jít kàu ông pēng-an tò-lái ê jít, i bô siu-chéng kha, iā bô siu-chéng chhui-chhiu, iā bô soé-saⁿ. ²⁵I tī Iā-lō·sat-léng ngiā-chih ông ê sī, ông kā i kóng, Bí-hui-pho-siat, lí siáⁿ-sū bô kap goá lóh--khi? ²⁶I òn kóng, Goá ê chú goá ê ông ah, tng-sī lí ê lô·pók siūⁿ kóng, goá beh pī-pān lū, khiā i kap ông saⁿ-kap khi; in-tui lí ê lô·pók sī pái-kha; chóng-sī goá ê lô·pók phiàn goá; ²⁷koh tī goá ê chú goá ê ông ê bīn-chēng hui-pòng lí ê lô·pók; tók-tók goá ê chú goá ê ông chhin-chhiūⁿ Siōng-tè ê sū-chiá, chiàu lí só· khoàⁿ-choē hó·ê kiáⁿ i. ²⁸In-tui goá ê chó· choān-ke, tī goá ê chú goá ê ông ê bīn-chēng, lóng sī tiòh sí ê lāng; chóng-sī lí hō· lí ê lô·pók kap lí chit-toh ê lāng saⁿ-kap chiáh, goá iáu ū sīm-mih lí-iū thang koh tui ông kiū-kiò ah? ²⁹Ông tui i kóng, Lí siáⁿ-sū koh kóng lí ê tēi-chi ah? Goá kóng, Lí kap Sé-pa tiòh pīⁿ-pun hiah ê giáp-sán. ³⁰Bí-hui-pho-siat kā ông kóng, Goá ê chú goá ê ông í-keng pēng-an tò-lái kiong-lái, kù-chāi i lóng thēh--khi,

iā thang.

³¹Ki-liát lāng Pa-se-lāi tui Lō-ki-līm lōh-lāi, beh sàng ông kè Iok-tàn, chiū kap ông kè Iok-tàn. ³²Pa-se-lāi chin-lāu, í-keng poeh-cháp hē; ông toà tī Má-hap-liām ē sī, i ēng chiāh-mih kiong-kip ông; in-ūi i sī toā hó-giāh lāng. ³³Ông kā Pa-se-lāi kóng, Lí kap goá kè-khì, kap goá toà Iā-lō-sat-léng, goá beh kiong-kip lí. ³⁴Pa-se-lāi kā ông kóng, Goá ē sīⁿ-miā ū kúi nī, kúi jīt, hō goá kap ông saⁿ-kap chiūⁿ Iā-lō-sat-léng ah? ³⁵Goá hiān-kim í-keng poeh-cháp hē lah, iáu oē hun-piat hó-pháiⁿ mah? Lí ē lô-pók iáu oē chhi lim-chiāh ē chu-bī mah? chhiūⁿ-koa ē lâm-lú goá oē hiáu thiaⁿ i ē siaⁿ-im mah? Lô-pók siáⁿ-sū thoa-lūi goá ē chú goá ē ông ah? ³⁶Lí ē lô-pók chí-ū sī beh kap ông kè Iok-tàn chit-chām-á; ông siáⁿ-sū tiōh ēng chit ē pò-siúⁿ pò-siúⁿ goá ah? ³⁷Kiū lí chún lí ē lô-pók tò-khì, hō goá thang sī tī goá ē pún siáⁿ, goá ē pē-bú ē bōng hia. Khoàⁿ ah, lí ē lô-pók Kim-hán tī chia; hō i kap goá ē chú goá ē ông kè-khì; chiāu lí sóⁿ khoàⁿ-choē hó-ē khoán-thāi i. ³⁸Ông kóng, Kim-hán thang kap goá khì; goá beh chiāu lí sóⁿ khoàⁿ-choē hó-ē lāi khoán-thāi i; lí kīⁿ-ū tui goá kiū-ē, goá beh kā lí chiāⁿ. ³⁹Tui án-ni cheng peh-siⁿ kè Iok-tàn, ông iā kè-khì; ông chiū kap Pa-se-lāi chim-chhui, kā i chiok-hok; i chiū tò-khì i pún sóⁿ-chāi.

⁴⁰Tui án-ni ông kè-khì, kàu Kiat-kah; Kim-hán iā kap i kè-khì; Iū-tāi cheng peh-siⁿ, kap Í-sek-liát peh-siⁿ ē chit-poàⁿ, iā lóng sàng ông kè-khì. ⁴¹Í-sek-liát cheng-lāng lāi kīⁿ ông, kā i kóng, Goán ē hiaⁿ-tī Iū-tāi lāng siáⁿ-sū thau lí khì, lāi choā ông kap i ē ke-koàn, kap kun-tè Tāi-pit ē lāng, lóng saⁿ-kap kè Iok-tàn? ⁴²Iū-tāi cheng-lāng in Í-sek-liát lāng, kóng, In-ūi ông kap goán sī tâng-chong, lín siáⁿ-sū in-ūi

chit ē sū siū-khì ah? Goán bat chiāh-tiōh ông sím-mih ah? ông bat ēng sím-mih sàng goán mah? ⁴³Í-sek-liát lāng in Iū-tāi lāng kóng, Chiāu chi-phài, chit ē ông goán ū cháp-hūn, goán tui-tī Tāi-pit pí lín khah ū koan-hē; lín siáⁿ-sū khoàⁿ-khin goán, choā goán ē ông tò-lāi, bô tūi-seng kap goán chham-siōng ah? Tók-tók Iū-tāi lāng ē oē, pí Í-sek-liát lāng ē oē, khah-ngī.

20 Tī-hia tú-tng ū chit ē húi-lūi, sī Piān-ngá-bín lāng, Pí-ki-lī ē kiáⁿ, miā kiò Sī-pa; i pūn sàu-kak kóng, Goán tui-tī Tāi-pit bô-hūn, goán tui-tī Iā-se ē kiáⁿ bô kan-siáp; Í-sek-liát lāng ah, lín ták-lāng tò-khì lín ē pò-pīⁿ. ²Tui án-ni, Í-sek-liát cheng-lāng lóng lī-khui Tāi-pit, khì tè Pí-ki-lī ē kiáⁿ Sī-pa; tók-tók Iū-tāi lāng, tui Iok-tàn kàu Iā-lō-sat-léng, lóng tè i ē ông tiāu-tiāu.

³Tāi-pit kàu Iā-lō-sat-léng, jip i ē ông-kiong; ông chiong cheng sóⁿ lâu-teh kò-chhiū ē cháp ē pín-hui, koaiⁿ-kīm in tī pát keng chhiū, kiong-kip in chiāh-ēng, bô kap in chhin-kūn; in siū koaiⁿ-kīm, chhin-chhiūⁿ koáⁿ-hū, tít-kàu in sí ē jīt.

⁴Ông kā A-má-sat kóng, Lí tiōh tī saⁿ-jīt-lāi kā goá chio-chip Iū-tāi lāng lāi, lí iā tiōh lāi chia. ⁵A-má-sat chiū khì chio-chip Iū-tāi lāng, chóng-sī i iān-chhiān kè sóⁿ hān ē kī. ⁶Tāi-pit kā A-pí-su kóng, Taⁿ Pí-ki-lī ē kiáⁿ Sī-pa beh hāi lán, pí Ap-sa-liōng khah siōng-tiōng; lí tiōh toà lí chú-lāng ē lô-pók tui-jip i, kiaⁿ-liáu i tit-tiōh kian-kòⁿ ē siáⁿ, siám-pī lán. ⁷Iok-ap ē lāng, kap Ki-lī-thē lāng, Pí-lī-thē lāng, kap cheng íong-sū, lóng chhut-khì tè A-pí-su, tui Iā-lō-sat-léng chhut-khì, tui-jip Pí-ki-lī ē kiáⁿ Sī-pa. ⁸In kàu Ki-piàn ē toā chiōh-poāⁿ hia, A-má-sat lāi kàu in ē bīn-cheng; hit-sī Iok-ap sóⁿ chhēng ē chiān-kah,

hâ tī i ê seng-khu, goā-bīn ũ toà, koh ũ kiàm pāk tī io--nih, chhah tī siù--lāi; i kiāⁿ ê sī, kiàm tui siù--nih lak--chhut-lāi. ⁹Iok-ap kâ A-má-sat kóng, Goá ê hiaⁿ, lí pêng-an mah? Iok-ap chiū ēng chiàⁿ-chhiú loáh A-má-sat ê chhui-chhiu, beh kap i chim-chhui. A-má-sat bô tiuⁿ-tī Iok-ap chhiú--nih só· kiáh ê kiàm; Iok-ap ēng hit ki chhi-jip i ê pak-tó· hō· i ê tng-á lâu tī toē--nih; bô koh chhak i, chiū sí. Iok-ap kap i ê sió-tī A-pí-su khi tui-jip Pí-ki-lī ê kiáⁿ Sī-pa. ¹¹Iok-ap ê siàu-liân lâng tiong, ũ chit-ê khiā tī hí piⁿ-á, kóng, Chī-chui hoaⁿ-hí Iok-ap, chī-chui kui-sūn Tāi-pit, chiū tiōh tè Iok-ap khi. ¹²A-má-sat tī lō·-tióng kō tī i ê huìh--nih; hit-lâng khoàⁿ-kìⁿ cheng peh-siⁿ lóng theng-kha, chiū chiong A-má-sat tui lō·-tióng soá kàu chhân--nih, ēng saⁿ khàm i; in-ūi khoàⁿ-kìⁿ kàu hia ê lâng lóng theng-kha. ¹³Sin-si tui lō·-tióng soá--khi í-āu, cheng peh-siⁿ chiū lóng tè Iok-ap, khi tui-jip Pí-ki-lī ê kiáⁿ Sī-pa.

¹⁴I piàn-kiāⁿ Í-sek-liat chiaⁿ ê chi-phai, tit-kàu Pek-má-ka ê A-pí-lah, kap Pí-lī lâng; in iā chū-chip lai tè i. ¹⁵In kàu Pek-má-ka ê A-pí-lah, ũi-khùn i, chiū tī siāⁿ-goā khi thô·tui, khi tī goā-siāⁿ ê tui-bīn. Iok-ap kap tē i ê cheng peh-siⁿ lòng siāⁿ beh hō· i tó. ¹⁶Ū chit ê chhang-miā ê hū-jîn-lâng tui siāⁿ-nih kiò kóng, Thiaⁿ ah, thiaⁿ ah; kiū lín kâ Iok-ap kóng, Chhiáⁿ lí lai chia, goá beh kap lí kóng-oē. ¹⁷I chiū kiāⁿ-oá--lāi; hū-jîn-lâng kóng, Lí sī Iok-ap á m-sī? I òn kóng, goá sī lah. Hū-jîn-lâng kóng, Kiū lí thiaⁿ lú-pī ê oē. Ìn kóng, Goá teh thiaⁿ. ¹⁸Hū-jîn-lâng kóng, Kó·-chá lâng siōng-siōng kóng, Tiōh tī A-pí-lah chheng-mng, tai-chi chiaⁿ oē kái-koat. ¹⁹Goán tī Í-sek-liat tiong, sī hô-peng tiong-hō· ê; lí siūⁿ beh biat Í-sek-liat tiong

ê hú-siāⁿ; lí siāⁿ-sū ài thun-biat Iā-hô-hoa ê sán-giap ah? ²⁰Iok-ap òn kóng, Goá koat-toàn m-ài thun, koat-toàn m-ài biat. ²¹Tāi-chi m-sī án-ni; put-kò sī in-ūi Í-hoat-liân soaⁿ-toē ũ chit ê lâng, Pí-ki-lī ê kiáⁿ, miā-kiò Sī-pa, ũ khi-chhiú kong-kek ông, chiū-sī Tāi-pit; nā chiong i chit-lâng kau-chhut, goá chiū lī-khui chit ê siāⁿ. Hū-jîn-lâng kâ Iok-ap kóng, Lí khoàⁿ, i ê thau-khak beh tui siāⁿ-téng hiat hō· lí. ²²Hū-jîn-lâng chiū chiau i ê tī-hui khng cheng-lâng; in chiū chám Pí-ki-lī ê kiáⁿ Sī-pa ê thau-khak, hiat hō· Iok-ap. I chiū pūn sàu-kak, cheng-lâng chiū lī-khui siāⁿ sì-soaⁿ; tak-lâng tò-khi i ê pò·-pīⁿ. Iok-ap tò-khi Iā-lō·-sat-leng, kàu ông hia.

²³Iok-ap choē Í-sek-liat ê chóng-kun-tiūⁿ; Iā-hô-iā-tai ê kiáⁿ Pí-ná-ngá koán-hat Ki-lī-thê lâng kap Pí-lī-thê lâng. ²⁴A-to-lân koán-lí choē ông ê kang ê; A-hi-lut ê kiáⁿ Iok-sa-hoat choē sú-koaⁿ; Sī-hoat choē pì-su. ²⁵Sat-tok kap A-pí-a-tha choē chè-si; ²⁶Gai-jīⁿ lâng Í-lah choē Tāi-pit ê leng-siú.

21 Tī Tāi-pit ê sī, ũ ki-hng, liân-liân saⁿ-nī; Tāi-pit chiū mng Iā-hô-hoa. Iā-hô-hoa kóng, Sī in-ūi Sò-lô kap i ê ke, lâu lâng ê huìh ê, in-ūi i thāi-sí Ki-piàn lâng. ³Ki-piàn lâng pún m-sī Í-sek-liat lâng, chiū-sī A-mô·lī lâng só· chhun ê; Í-sek-liat lâng bat tui in chiū-choā, m thāi in; chóng-sī Sò-lô ũi-tiōh Í-sek-liat lâng kap Iū-tai lâng jiát-sim, siūⁿ kè-bô· thāi in; ông chiū tiâu Ki-piàn lâng lai, kâ in kóng. ³Tāi-pit kâ Ki-piàn lâng kóng, Goá tiōh ũi lín choē sim-mih? goá tiōh ēng sim-mih lai thoē-siok, hō· lín chiok-hok Iā-hô-hoa ê sán-giap ah? Ki-piàn lâng kóng, Goán kap Sò-lô kap i ê ke ê sū bô koan-hē kim-gūn, iā m-thang ũi-tiōh goán ê iân-kò· hāi-sí chit ê Í-sek-liat lâng. I kóng, Lín só· kóng cháiⁿ-iūⁿ,

goá beh ũi lín kiáⁿ i. ⁵In tùi ông kóng, Hit ê chiông-chêng húi-hoãi goán, bô·hãi goán, beh biát boán, hō· goán boē-tit-thang khiā-khí tī Í-sek-liát ê kóng-lái ê; taⁿ goán ēng i ê hō·-è chhit-lâng kau-hù goán, goán beh tī Iâ-hô-hoa ê bîn-chêng, chiong in tiâu tī Iâ-hô-hoa só· kóng Sò-lô ê Ki-pí-a. Ông kóng, Goá beh kau-hō· lín. ⁷Sò-lô ê kiáⁿ Iok-ná-tan, i ê kiáⁿ Bí-hui-pho-siat ông pò-sioh, in-ũi Tāi-pit kap Sò-lô ê kiáⁿ Iok-ná-tan chêng bat kí Iâ-hô-hoa ê miâ lai chiū-choā. ⁸Chóng-sī ông chiong Ài-ngá ê cha-bó·-kiáⁿ Lī-su-pa ká Sò-lô só· siⁿ nng ê kiáⁿ, A-mô·-nī, Bí-hui--pho-siat; kap Sò-lô ê cha-bó·-kiáⁿ Bí-kah ká Bí-hô-lah lêng Pa-se-lai ê kiáⁿ A-tek-liát só· siⁿ ê gō· ê kiáⁿ, ⁹lóng kau tī Ki-piàn lêng ê chhiú, in chiū tiâu in tī soaⁿ--nīh, tī Iâ-hô-hoa ê bîn-chêng; chí chhit-lâng lóng choē chit-ē tó--lôh-lai, lóng-chóng sí tī khí-thâu siu-koah ê sí, chiū-sī khí-thâu koah toā-béh ê sí. ¹⁰Ài-ngá ê chá-bó·-kiáⁿ Lī-su-pa thêh chho·-moa-pò, ũi ka-kī chhu tī chiòh-poāⁿ-téng, tùi khí-thâu siu-koah ê sí, kàu thiⁿ lóh hō·-chúi tī sin-si ê sí; m̄-chún jlt-sī khong-tiong ê chiáu, kap mī-sī ê cháu-siù, kàu tī hiah ê sin-si. ¹¹Ũ lêng chiong Sò-lô ê hui Ài-ngá ê cha-bó·-kiáⁿ Lī-su-pa só· choē ê sū ká Tāi-pit kóng. ¹²Tāi-pit chiū khi, tùi Ki-liát-ngá-pí lêng thêh Sò-lô ê kut, kap i ê kiáⁿ Iok-ná-tan ê kut, in bat tùi Pek-san ê koe-lō· thau-thêh, in-ũi Hui-lī-sū lêng chêng tī Ki-lī-pho thâi-sí Sò-lô ê sí, Hui-lī-sū lêng ũ tiâu in tī-hia. ¹³I chiū tùi hia toà Sò-lô ê kut, kap i ê kiáⁿ Iok-ná-tan ê kut, tò-lai; lêng chiū siu-síp hiah-ê siū tiâu-sí-ê ê kut. ¹⁴Chiū bài-chòng Sò-lô kap i ê kiáⁿ Iok-ná-tan ê kut tī Piān-ngá-bín toē ê Sé-lah, tī Sò-lô ê pē Ki-sū ê bōng; chiàu ông it-chhè só· bēng-lēng ê khi kiáⁿ; chit-tiáp liáu-āu Siōng-

tè ũi-tiòh hit ê toē-hng thiaⁿ in ê kī-tó.

¹⁵Hui-lī-sū lêng koh kap Í-sek-liát lêng kau-chiàn. Tāi-pit kap i ê lô·-pòk lòh-khi, kap Hui-lī-sū lêng kau-chiàn; Tāi-pit chin ià-siān. ¹⁶Ũ toā-hàn-chòk ê chit-lâng miâ-kiò Í-sit-pí-lòk, i ê chhiuⁿ ê tâng tâng saⁿ-pah sià-khek-lèk, koh pē sin ê to, beh thâi Tāi-pit. ¹⁷Chóng-sī Sé-ló·-ngá ê kiáⁿ A-pí-su pò-hō· Tāi-pit, phah-sí hit ê Hui-lī-sū lêng. Tng-sī tè Tāi-pit ê lêng tùi i chiū-choā, kóng, Chit-tiáp liáu-āu lí m̄-thang koh kap goán chhut-chiàn, kiaⁿ-liáu phah-hoa Í-sek-liát ê teng.

¹⁸Āu-lai koh kap Hui-lī-sū lêng kau-chiàn tī Ko-pek; hit-sī ũ Hō·sa lêng Se-pí-kai thâi-sí chit ê toā-hàn-chòk ê lêng, miâ-choē Sat-hut. ¹⁹Koh-chài tī Ko-pek kap Hui-lī-sū lêng kau-chiàn; Pek-lī-hêng lêng Ngá-lui-gô-jīⁿ-kim ê kiáⁿ I-lék-hap-lân thâi-sí Ka-ték lêng Ko-lī-à; i ê chhiuⁿ-pìⁿ chhin-chhiūⁿ pò·-kui ê ték-sim. ²⁰Koh tī Ka-ték kau-chiàn; tī-hia ũ chit ê toā-hàn lêng, nng ki chhiú kok ũ lăk ki chng-thâu-á, nng ki kha kok ũ lăk ki chng--thâu-á, kiōng ũ jī-cháp-si ki; i iā sī toā-hàn-chòk lêng ê kiáⁿ. ²¹Chit-lêng biáu-sī Í-sek-liát ê sí, Tāi-pit ê hiaⁿ Sī-bí-a ê kiáⁿ Iok-ná-tan chiū ká i thâi-sí. ²²Chí sī-lêng Ka-ték toā-hàn lêng só· siⁿ ê; lóng sí tī Tāi-pit ê chhiú, kap i ê lô·-pòk ê chhiú.

22 Tng Iâ-hô-hoa kiù Tāi-pit thoat-lī it-chhè ê tui-ték ê chhiú, kap Sò-lô ê chhiú ê jlt, i ñg Iâ-hô-hoa liām chit ê si ê oē, kóng,

²Iâ-hô-hoa sī goá ê soaⁿ-giām, goá ê iāⁿ-chē, chín-kiù goá ê.

³Siōng-tè sī goá ê chiòh-poāⁿ, goá beh óa-khò I;

I sī tīn-pai, sī chín-kiù goá ê kak, sī goá ê koāiⁿ-tai, sī goá ê pī-lān-só;

Chín-kiù goá ê ah, Lí sī kiù goá thoat-lī

không-pō ê.

⁴Goá beh kiû-kiò Iâ-hô-hoa, I sī eng-kai o-ló ê;

Án-ni goá beh tit-tiòh kiù, thoat-lī goá ê tùi-ték.

⁵Sí-bô ê chúí-éng ùi goá,

Húi-lūi ê hoàn-lām hō· goá kiaⁿ.

⁶Im-kan ê soh tīⁿ goá,

Sí-bô ê oáh-tauah kàu tī goá.

⁷Goá tī hoān-lān tiong kiû-kiò Iâ-hô-hoa,

Goá kiû-kiò goá ê Siōng-tè.

I tùi tiān--nih thiaⁿ goá ê siaⁿ,

Goá ê kiû-kiò jlp I ê hī-khang.

⁸Toē chiū tín-tāng iô-choah,

Thiⁿ ê kun-ki iā gī-gī-chùn,

Ūi-tiòh I ê siū-khì lāi tín-tāng.

⁹Tùi I ê phīⁿ-khang ū ian chheng chiūⁿ-khì,

Tùi I ê chhùi ū chhut sio-biát ê hé,

Thoàⁿ tùi án-ni tòh.

¹⁰I hō· thiⁿ kē--lòh-lāi, chiū kàng-līm,

Tī I ê kha-ē ū o·-hūn.

¹¹I khiá ki-lō·-peng teh pe,

Tī hong ê sít-téng hián-hiān.

¹²I ēng o·-àm choè chiu-úi ê tiūⁿ-pāng,

Chiū-sī chū-chíp ê chúí, kap khong-tiong ê bát-hūn.

¹³In-úi I bīn-chēng ê kng,

Hé-thoàⁿ chiū tòh--khì-lāi.

¹⁴Iâ-hô-hoa tùi thiⁿ khí lúi,

Chì-koàiⁿ--ê hoat-chhut I ê siaⁿ.

¹⁵I siā chìⁿ lāi koáⁿ-soàⁿ in,

Sih-nà lāi hō· in loān.

¹⁶Hái-toé chiū chhut-hiān,

Toā-toē ê kun-ki iā lō·-hiān,

Sī in-úi Iâ-hô-hoa ê chek-pī,

Iā in-úi I ê phīⁿ-khang pūn-chhut ê khì.

¹⁷I tùi téng-bīn chhun-chhiú khiú goá,

Tùi toā-chúí-tiong khan goá chhut;

¹⁸I kiù goá thoat-lī íong-béng ê tùi-ték,

Kap hiah ê oàn-hūn goá ê lāng,

In-úi in pí goá khah ū lát.

¹⁹Goá tú-tiòh hoān-lān ê jlt, in lāi khún-pek goá,

Chóng-sī Iâ-hô-hoa sī goá só· oá-khò ê.

²⁰I chhoā goá kàu khui-khoah ê só·-chāi;

I kiù goá, in-úi I hoaⁿ-hí goá.

²¹Iâ-hô-hoa chiàu goá ê kong-gī pò-tap goá,

Chiàu goá ê chhiú ê chheng-khì pò-siúⁿ goá.

²²In-úi goá siú Iâ-hô-hoa ê tō-lō·,

Bē-bat choè pháiⁿ, lī-khui goá ê Siōng-tè.

²³I it-chhè ê hoat-tō· tī goá ê bīn-chēng,

I ê lút-lē, goá iā bô poē-gék.

²⁴Goá tùi-tī I sī oàn-choân,

Goá iā siú pún-sin bô kiāⁿ goá ê pháiⁿ.

²⁵Só·-í Iâ-hô-hoa pò-siúⁿ goá, sī chiàu goá ê kong-gī,

Iā chiàu goá tī I ê bák-chiu-chēng ê chheng-khì.

²⁶Tùi-tī jīm-chū ê lāng, Lí hián-bēng ka-kī sī jīm-chū,

Tùi-tī oàn-choân ê lāng, Lí hián-bēng ka-kī sī oàn-choân;

²⁷Tùi-tī chheng-khì ê lāng, Lí hián-bēng ka-kī sī chheng-khì;

Tùi-tī koai-phiah ê lāng, Lí hián-bēng ka-kī sī oan-khiau.

²⁸Khùn-khó· ê peh-siⁿ, Lí kiù i.

Lí ê bák-chiu khoàⁿ kiau-ngō· ê lāng, hō· i kàng-kē.

²⁹Iâ-hô-hoa ah, Lí sī goá ê teng,

Iâ-hô-hoa beh chiò-kng goá ê o·-àm.

³⁰In-úi goá oá-khò Lí chhiong-jlp kun-tūi, Oá-khò goá ê Siōng-tè, chiū thiàu-kè chhiūⁿ.

³¹Lūn-kàu Siōng-tè, I ê tō-lō· sī oàn-choân ê,

Iâ-hô-hoa ê oē, sī kè thoàn-liân ê;
Kìⁿ-nā oá-khò I ê, I chiū choè in ê tín-pâi.
³²Iâ-hô-hoa í-goā, chī-chūi sī Siōng-tè ah?
Lán ê Siōng-tè í-goā, chī-chūi sī chiòh-poāⁿ
ah?

³³Siōng-tè sī goá kian-kò· ê iāⁿ-chē,
I ín-chhoā oân-choân ê lāng kiāⁿ I ê lō·.
³⁴I hō· goá ê kha chhin-chhiūⁿ lók-bú,
Hō· goá khiā tī goá koāiⁿ ê só·-chāi.
³⁵I kà-sī goá ê chhiú oē kau--chiàn,
Tī-kàu goá ê chhiú-kut oē khui tâng-keng.
³⁶Lí ēng Lí ê chín-kiù hō· goá choè tín-pâi,
Lí ê un-jiū hō· goá choè toā.
³⁷Lí hō· goá ê kha só· táh ê toē khui-khoah,
Goá ê kha iā bē-bat táh-thút.
³⁸Goá tui-jip goá ê tui-ték, lâi chián-tū in;
In bē châu-biát ê tãi-seng, goá bô tò-túg-
lâi.

³⁹Goá châu-biát in, phah-siong in,
Hō· in boē khí-lâi, tó tī goá ê kha-ē.
⁴⁰In-ūi Lí bat ēng khui-lát hā goá, hō· goá
oē kau-chiàn,

Lí hō· hiah ê khí-lâi kong-kek goá ê, lóng
hâng-hók goá.

⁴¹Lí hō· goá ê tui-ték òng goá oát-túg-sin,
Hō· goá thang chián-tū hiah ê oân-hūn goá
ê lāng.

⁴²In sì-koè khoàⁿ, iā bô chín-kiù in ê,
Chiū òng-bāng Iâ-hô-hoa, I iā m̄ in i.

⁴³Goá tui in iù-iù, chhin-chhiūⁿ toē-chiūⁿ ê
tín-ai,

Goá táh in chhin-chhiūⁿ koe-lō· ê thô·-bê,
hō· in sì-soàⁿ.

⁴⁴Lí kiù goá thoat-lī goá ê peh-sìⁿ ê saⁿ-
chiⁿ,

Pó-chūn goá choè liát-kok ê thâu-bák;
Goá só· m̄-bat ê peh-sìⁿ beh hók-sāi goá.

⁴⁵Goā-pang lāng beh tâu-hāng goá,

Chit-ē thiaⁿ-kìⁿ, chiū beh chun-thàn goá.
⁴⁶Goā-pang lāng beh soe-pāi,
Tui in pì-bát ê só·-chāi ngiāuh-ngiāuh-
chhoah chhut-lâi.

⁴⁷Iâ-hô-hoa sī oáh ê, goān goá ê chiòh-poāⁿ
tit-tiòh o-ló,

Goān Siōng-tè, chiū-sī kiù goá ê Chiòh-
poāⁿ--ê, tit-tiòh chun-choè koāiⁿ;

⁴⁸Chiū-sī thoè goá sin-oan ê Siōng-tè,
Hō· hiah ê peh-sìⁿ hāng-hók goá ê;

⁴⁹Kiù goá thoat-lī goá ê tui-ték ê;
Koh kú-khi goá khah koāiⁿ hiah ê khí-lâi
kong-kek goá ê.

Lí kiù goá thoat-lī kiōng-pō ê lāng.
⁵⁰Iâ-hô-hoa ah, in-ūi án-ni goá beh tī liát-
pang kám-siā Lí,

Iā beh chhiūⁿ-koa o-ló Lí ê miā.
⁵¹Iâ-hô-hoa toā-toā chín-kiù I só· siat-lip ê
ông,

Sì chū-ài hō· I só· boah-iū-ê,
Chiū-sī hō· Tāi-pit kap i ê hō·-è, kàu éng-
oán.

23 Tāi-pit kiát-bé ê oē, pāi-liát tī ē-toé.
Iâ-se ê kiáⁿ Tāi-pit kóng,

Tit-tiòh seng-koāiⁿ ê lāng,
Sī Ngá-kok ê Siōng-tè só· boah-iū ê,

Tī Í-sek-liát gâu choè-koa--ê kóng:
²Iâ-hô-hoa ê Sîn ēng goá lâi kóng,

I ê oē tī goá ê chíh.
³Í-sek-liát ê Siōng-tè ū kóng,

Í-sek-liát ê Chiòh-poāⁿ tui goá kóng:
Ēng kong-gī tī-lí lāng,

Kèng-ùi Siōng-tè lâi tī-lí ê,
⁴I beh chhin-chhiūⁿ thau-chá jít tú-á chhut

ê kng,
Bô hūn ê chheng-chá,

Hō· lóh kè-sin ê kng-chhái;
Hō· toē hoat iù-iù ê chháu.

⁵Goá ê ke tī Siōng-tè ê bīn-chêng m̄-sī án-ni;

Iáu-kú I ū kap goá līp éng-oán ê iok,

Bô m̄ chiàu chhù-sū pài-liát koh kian-kò;

Sui-jiân I bô hō· i seng-tióng,

Che chiū-sī goá it-chhè ê chín-kiù, it-chhè ê ì-goān.

⁶Chóng-sī húi-lūi lóng chhin-chhiūⁿ chhi-á beh siū koah-sak,

Lâng m̄-káⁿ ēng chhiú thèh i;

⁷Beh bong i ê lâng,

Tiōh ēng thiñ-khì kap chhiuⁿ-pìⁿ,

Tī i ê só·-chāi beh hō· hé it-chīm sio-khì.

⁸Tāi-pit íong-sū ê miá kì tī ē-toé; kun-tiúⁿ ê thâu, Tha-kek-būn lâng Iok-siat-pasiat; chiū-sī I-su-ni lâng A-tí-lô, chit-sī phah-sí poeh-pah lâng.

⁹Koh chit-ê sī A-háp lâng Tó-to ê kiáⁿ Í-lī-a-sat; chêng Hui-lī-sū lâng chū-chíp beh kau-chiàn, Í-sek-liát lâng í-keng khì, ū saⁿ ê íong-sū tè Tāi-pit, tui Hui-lī-sū lâng thó-chiàn; i sī in tióng-kan ê chit-ê. ¹⁰I khí-lāi phah Hui-lī-sū lâng, kàu chhiú sng, chhiú kap kiàm saⁿ-liām. Hit-jit Iâ-hô-hoa toā-toā khah-iâⁿ, chêng peh-siⁿ oát-túg tī i ê āu-bīn, kò chhiúⁿ-mih nā-tiāⁿ.

¹¹Koh chit-ê sī Háp-lah lâng A-ki ê kiáⁿ Sa-má; ū chit-jit Hui-lī-sū lâng chū-chíp chiāⁿ-tīn, tī chit-khu âng-tāu ê hng; peh-siⁿ chiū tī Hui-lī-sū lâng ê bīn-chêng tô-cháu. ¹²I tòng-tiâu tī hit khu hng, lâi pó-siú i, phah Hui-lī-sū lâng; Iâ-hô-hoa toā-toā khah-iâⁿ.

¹³Siu-koah ê sī, saⁿ-cháp ê siú-léng tióng ū saⁿ lâng lóh-khì kàu A-tō·-lân tōng, kìⁿ Tāi-pit. Hui-lī-sū lâng kun-peng chat-iâⁿ tī Lī-hoat-im ê soaⁿ-kok. ¹⁴Hit-sī Tāi-pit tī soaⁿ-chē; Hui-lī-sū lâng hông-siú ê peng tī Pek-lī-hêng. ¹⁵Tāi-pit him-soān kóng, Chī-chui oē

ēng Pek-lī-hêng siâⁿ-mng-piⁿ ê chíⁿ-chui hō· goá lim? ¹⁶Chí saⁿ ê íong-sū chiū chhiong-kè Hui-lī-sū lâng ê iâⁿ-poāⁿ, tui Pek-lī-hêng siâⁿ-mng-piⁿ ê chíⁿ chhiūⁿ-chui, koāⁿ lâi hō· Tāi-pit; chóng-sī i m̄-kam lim, chiū piàⁿ tī Iâ-hô-hoa ê bīn-chêng, kóng, ¹⁷Iâ-hô-hoa ah, goá koat-toàn m̄-choè án-ni; che kiám m̄-sī phe-miá khì ê lâng ê huìh? Só·-í i m̄-lim. Chí saⁿ ê toā íong-sū ū choè chiah ê tui-chi. ¹⁸Sé-ló·-ngá ê kiáⁿ Iok-ap ê sió-tī A-pí-su sī choè saⁿ ê íong-sū ê thâu-lâng; i kiáh i ê chhiuⁿ phah-sí saⁿ-pah lâng, chiū tī saⁿ ê íong-sū tióng ū miá. ¹⁹I kiám m̄-sī saⁿ ê íong-sū tióng ê tē-it chun-kui-ê mah? só·-í choè in ê thâu; chóng-sī put-kíp chêng saⁿ ê íong-sū.

²⁰Koh ū Kah-siat lâng toā íong-sū Iâ-hô-iâ-tāi ê kiáⁿ Pí-ná-ngá; i ū kiáⁿ-chhut choē-choē toā-sū; i thài-sí Mô·-ap lâng A-lī-i-lék nng ê kiáⁿ; koh tī lóh-seh ê sī lóh khiⁿ-lāi, thài-sí chit chiah sai. ²¹Koh thài-sí Ai-kíp chit ê toā-hàn lâng; Ai-kíp lâng chhiú--nih kiáh chhiuⁿ, Pí-ná-ngá chí-ū kiáh thui lóh-khì i hia, chhiúⁿ Ai-kíp lâng chhiú--nih ê chhiuⁿ, ēng hit ki chhiuⁿ ká i chân--sí. ²²Che sī Iâ-hô-iâ-tāi ê kiáⁿ Pí-ná-ngá só· kiáⁿ ê sū; chiū tī saⁿ ê íong-sū tióng tit-tiōh miá. ²³I pí saⁿ-cháp ê íong-sū khah chun-kui; chóng-sī put-kíp chêng saⁿ ê íong-sū. Tāi-pit siat-lip i choè i ê sī-oē-tiúⁿ.

²⁴Saⁿ-cháp ê íong-sū tióng ū Iok-ap ê sió-tī A-sat-hek; koh ū Pek-lī-hêng lâng Tó-to ê kiáⁿ Í-lék-hap-lân; ²⁵Hap-lut lâng Sa-má, Hap-lut lâng Í-lī-ka; ²⁶Phaⁿ-lék-thê lâng Hī-lī-su, Thē-ko-a lâng Ek-kiat ê kiáⁿ Í-lah; ²⁷A-ná-tut lâng A-pí-í-siā, Hō·-sa lâng Bí-pún-nái; ²⁸A-háp lâng Sat-būn, Nī-tô-hoat lâng Má-hap-lai; ²⁹Nī-tô-hoat lâng Pa-ná ê kiáⁿ Hī-lip, Piān-ngá-bín chók Ki-pí-a lâng Lī-pai ê kiáⁿ Í-thai; ³⁰Pí-lah-tun lâng Pí-ná-ngá, Ka-sit khoe

lâng Hi-thài; ³¹Pek-a-lâh-pa lâng A-pí-a-pún, Pa-ló-bí lâng Ap-su-má-hut; ³²Sa-pún lâng Í-lī-ngá-hap-pa, Ngá-siān chiah ê kiáⁿ tiong ê Iok-ná-tan; ³³Hap-lâh lâng Sa-má, Hap-lâh lâng Sa-lâh ê kiáⁿ A-hi-àm; ³⁴Má-ka lâng A-hap-pài ê kiáⁿ Í-lī-hoat-liát, Ki-lô lâng A-hi-to-hut ê kiáⁿ Í-liân; ³⁵Ka-bít lâng Hi-su-lâi, A-pa lâng Phàⁿ-lâi; ³⁶Só-pa lâng Ná-tan ê kiáⁿ Í-kaⁿ, Ka-ték lâng Pa-ni; ³⁷A-bún lâng Sé-lék, Pí-liók lâng Ná-hap-lâi, sī ká Sé-ló-ngá ê kiáⁿ Iok-ap kiáh kun-khi ê; ³⁸Í-thiap lâng Í-lâh, Í-thiap lâng Ka-líp; ³⁹Hek lâng O-lī-à; kiōng saⁿ-cháp-chhit lâng.

24 Iâ-hô-hoa koh siū-khi Í-sek-liát lâng, kek-tōng Tâi-pít lâi hāi in, chiū kóng, Tiōh khi sng Í-sek-liát kap Iû-tâi lâng. ²Ông hoan-hù kap i tī-teh ê kun-tiúⁿ Iok-ap kóng, Lí taⁿ khi piàn-kiáⁿ Í-sek-liát cheng chi-phài, tui Tàn kàu Piát-sī-pa, tiám-sng peh-siⁿ, hō goá chai peh-siⁿ ê siâu-giáh. ³Iok-ap ká ông kóng, Bô-lun peh-siⁿ joā-choē, goān Iâ-hô-hoa lí ê Siōng-tè ke-thiⁿ pah-pē, koh hō goá ê chú goá ê ông chhin-bák khoàⁿ-kìⁿ; chóng-sī goá ê chú goá ê ông siáⁿ-sū hoaⁿ-hí chit ê sū ah? ⁴Chóng-sī ông ê oē iāⁿ-kè Iok-ap kap hiah ê kun-tiúⁿ. Iok-ap kap hiah ê kun-tiúⁿ chiū tui ông ê bīn-cheng chhut-khi, tiám-sng Í-sek-liát ê peh-siⁿ. ⁵In kè Iok-tàn, chat-iāⁿ tī A-lô-jī^m, tī Ka-tek soaⁿ-kok tiong ê siāⁿ ê chiāⁿ-pêng, kap Ngá-siā saⁿ-kūn; ⁶koh kàu Ki-liát, kap Tha-thêng-háp-sī ê toē, koh kàu Tàn-ngá-an, sèh kàu Se-tùn; ⁷koh kàu Chhui-lô kian-kòⁿ ê siāⁿ, kap Hi-bī lâng í-kíp Ka-lâm lâng it-chhè ê siāⁿ; koh chhut-khi kàu Iû-tâi lâm-hng ê Piát-sī-pa. ⁸In piàn-kiáⁿ choān-toē, lèk-kè káu-géh-jit koh jī-cháp jit; chiū tò-túg kàu Iâ-lō-sat-léng. ⁹Iok-ap ēng sng peh-siⁿ ê siâu-giáh chìn hō ông chai. Í-sek-liát lâng kiáh to

ê ióng-sū poeh-cháp bān, Iû-tâi lâng ũ gō-cháp bān.

¹⁰Tâi-pít sng peh-siⁿ ê siâu-giáh liáu-āu, sim chiū ka-kī chek-pī. Tâi-pít ká Iâ-hô-hoa kóng, Goá kiāⁿ chit ê sū toā-toā ũ hoān-choē. Iâ-hô-hoa ah, kiū Lí tū-khi Lí ê lô-pók ê kè-sit, in-ūi goá sóⁿ-kiāⁿ-ê chin gōng. ¹¹Tâi-pít thiⁿ-kng-chá khí-lâi ê sī, Iâ-hô-hoa ê oē līm-kàu sian-ti Ka-tek, chiū-sī Tâi-pít ê sian-kiān ê, kóng, ¹²Lí khi ká Tâi-pít kóng, Iâ-hô-hoa án-ni kóng, Taⁿ Goá ēng saⁿ-hāng hō lí, lí keng chit-hāng, Goá thang kiāⁿ tī lí. ¹³Ka-tek chiū lâi thong-ti Tâi-pít, tui i kóng, Lí ài lí ê toē ki-hng chhit-ni kú mah? á-sī ài lí ê tui-ték tui-jip lí, lí tô-cháu tī i ê bīn-cheng saⁿ-géh-jit kú ah? á-sī ài un-ék tī lí ê toē saⁿ-jit kú ah? Taⁿ lí tiōh chim-chiok siūⁿ-khoàⁿ cheh, goá thang ēng sím-mih oē hē-hok chhe goá ê. ¹⁴Tâi-pít ká Ka-tek kóng, Goá chin ũi-lân, lán lêng-khóⁿ hām-lòh tī Iâ-hô-hoa ê chhiú, in-ūi I ũ hong-sēng ê lín-bín; goá m̄-goān hām-lòh tī lâng ê chhiú. ¹⁵Iâ-hô-hoa chiū kàng un-ék hō Í-sek-liát, tui chheng-chá kàu sóⁿ tiāⁿ-tiōh ê sī, tui Tàn kàu Piát-sī-pa; peh-siⁿ-kan sí chhit-bān lâng. ¹⁶Tng thiⁿ-sai chhun-chhiú tī Iâ-lō-sat-léng, beh biát i ê sī, Iâ-hô-hoa chiū thè-hoé kàng-lòh chit ê chai-ē, chiū ká biát peh-siⁿ ê thiⁿ-sai kóng, Kàu-giáh lah, kiu lí ê chhiú; hit-sī Iâ-hô-hoa ê sù-chiá tī Iâ-pò-su lâng A-lô-ná ê gō-kak-tiūⁿ. ¹⁷Tâi-pít khoàⁿ-khi phah peh-siⁿ ê thiⁿ-sai, chiū ká Iâ-hô-hoa kóng, Khoàⁿ ah, hoān-choē-ê sī goá, poē-gék-ê iā sī goá; chóng-sī chiah ê kui-kūn ê iūⁿ ũ choē sím-mih ah? goān Lí ê chhiú kong-kek goá, kap goá pē ê ke.

¹⁸Hit-jit Ka-tek lâi kìⁿ Tâi-pít, ká i kóng, Lí chiūⁿ-khi, tī Iâ-pò-su lâng A-lô-ná ê gō-kak-tiūⁿ, ká Iâ-hô-hoa khí chit chō toāⁿ. ¹⁹Tâi-pít

chiàu Ka-tek ê oē chiūⁿ-khì, chiàu Iâ-hô-hoa ê bēng-lēng. ²⁰A-lô-ná teh khoàⁿ, khoàⁿ-kìⁿ ông kap i ê jîn-sîn tùi-bīn lâi; A-lô-ná chiū chhut-khì, phak tī toē--nih pài ông. ²¹A-lô-ná kóng, Goá ê chú goá ê ông lâi lô·pók chia siáⁿ-sū? Tāi-pit kóng, Goá lâi beh boé lí chit ê gō·kak-tiūⁿ, kâ Iâ-hô-hoa khí chit chō toāⁿ, hō· peh-siⁿ-kan ê un-ék soah. ²²A-lô-ná kâ Tāi-pit kóng, Goá ê chú goá ê ông, chiàu lí só· khoàⁿ-choè hó-ê thêh-lâi hiàn i; khoàⁿ ah, chia ũ gū, thang choè sio-chè, ũ phah gō·kak ê khi-kū, kap thò gū ê ka-chhia, thang choè chhâ. ²³Ông ah, A-lô-ná ēng che it-chhè sàng hō· ông. A-lô-ná koh kâ ông kóng, Goān Iâ-hô-hoa lí ê Siōng-tè chiap-láp lí. ²⁴Ông kâ A-lô-ná kóng, M̄-thang ah, goá beh chiàu kè-chiⁿ kâ lí boé; goá m̄-khéng ēng pēh-pēh tit-tiōh ê mih choè sio-chè, hiàn hō· Iâ-hô-hoa goá ê Siōng-tè. Tāi-pit chiū ēng gō·cháp sià-khek-lék ê gūn, boé hit ê gō·kak-tiūⁿ kap gū. ²⁵Tāi-pit tī-hia kâ Iâ-hô-hoa khí chit chō toāⁿ, hiàn sio-chè kap siā-un-chè; án-ni Iâ-hô-hoa thiaⁿ in ũi toē-hng só· kiū ê, un-ék tī Í-sek-liát tiong chiū soah.